

## HEREVA LADA-ISIDIA

- <sup>1</sup> Solomon, David natuna, Israel pavapavana,  
ena hereva lada-isidia bini:
- <sup>2</sup> Taunimanima na aonega bona hahediba herevadia  
bona lalo-parara herevadia bae diba totona;
- <sup>3</sup> aonega karadia, kara maoromaoro,  
hahemaoro ġoevaġoева bona ahu korikorina  
daladia,  
bae hadibadia totona;
- <sup>4</sup> asi aonegadia taudia na bae henahua toho  
bona eregabe taudia na aonega bona karabal-  
aheni bae abi totona.
- <sup>5</sup> Aonega tauna danu baine kamonai, bena ena  
diba baine habadaia;  
bona lalo-parara tauna na baine ġaukara mai  
dibana ida;
- <sup>6</sup> hereva lada-isina bona haheġereġere anidia bae  
diba,  
aonega taudia edia hereva bona edia sivarai  
hehuni-hehunidia danu.
- <sup>7</sup> Iehova igari-henina na lalo-parara matamana;  
kavakava taudia ese aonega bona hahediba e  
dadaramiu.
- <sup>8</sup> Natugu e, tamamu ena hahediba ba kamonai,  
bona sinamu ena hahediba herevadia basio  
dadaraidia;
- <sup>9</sup> badina be idia be kwaramu ihaheralaina hera-  
heradia  
bona aiomu agevana na heheto.

- <sup>10</sup> Natugu e, kara dika taudia ese lalomu bae ania negana ai,  
edia ura basio abia dae.
- <sup>11</sup> Idia na bema toma: Aoma, aitala,  
rara ihahebubuna totona baita bani;  
asi edia kerere taudia na asi badina baita bani henidia;
- <sup>12</sup> mai mauridia ida baita hadonodia, mase gabuna ese bema hadonodia heğereğerena;  
baita hadonodia idoi, mase gurina ai e dihomu taudia na hehetu;
- <sup>13</sup> bena kohu namo-hereadia iboudiai baita davari,  
dadidadi kohudia amo eda rumu baita hanou;
- <sup>14</sup> oi na ai ida baita ġaukara hebou,  
benai boudai na moni modana tamona baita abia hebou.
- <sup>15</sup> Natugu e, idia ida basio raka hebou edia dala ai,  
aemu na edia dala irakalaina ai ba rudia;
- <sup>16</sup> badina be aedia na kara dika e heau heniamu,  
rara ihahebubuna totona e lao haraġamu.
- <sup>17</sup> Badina be manu vairadiai  
huo ionta na asi anina;
- <sup>18</sup> to ini taunimanima ese sibodia raradia ihahebubudia totona e banimu,  
sibodia edia mauri e bani henidiamu.
- <sup>19</sup> Daġedäge amo kohu e dadimu taudia iboudiai  
edia dala be unu hehetu;  
unu kara ese edia mauri e abi ohomu.
- <sup>20</sup> Aonega na ariara ai e boi lolomu,  
hoinoi gabudia ai gadona e habadaiamu;
- <sup>21</sup> maġu latadiai e lolomu,  
hanua ikoukoudia ai e herevamu, e tomu:

- <sup>22</sup> Asi aonegamui taumui e,  
 kware-kware ba ura henia ela bona edena  
 nega ai;  
 Ğonağona taudia na edia ġonağona bae moalelaia,  
 bona kavakava taudia na aonega bae inai  
 henia,  
 ela bona edena nega ai?
- <sup>23</sup> Egu sisiba herevadia ba hakala henidia;  
 a itaia, egu lalo-hadai na emui ai baina seja  
 dobi;  
 egu hereva baina hadibalaimui.
- <sup>24</sup> Badina be lau na boiboi, to umui na asio ura ba  
 kamonai;  
 imagu na toia roro, a ta ese se laloa;
- <sup>25</sup> egu hahealo idoinai vada o dadaraia,  
 egu sisiba herevadia ta asio abia dae.
- <sup>26</sup> Lau ese danu emui hahehisí baina kirikirilaia,  
 gari ese baine butumui tao negana ai baina  
 ġonağonalaimui;
- <sup>27</sup> gari ese baine butumui tao lai gubana na heto,  
 bona emui hahehisí ġaudia bae kau koehiri-  
 hiri na heto, negadia ai,  
 bona lalomui bae hisihisi bona daramui bae  
 doko negadia ai.
- <sup>28</sup> Unu negadia ai bae boi henigu, to basina haere;  
 bae tahugu malaka-malaka, to basie  
 davarigu.
- <sup>29</sup> Badina be idia ese aonega e inai heniava,  
 bona Iehova igari-henina asie abia hidiva;
- <sup>30</sup> egu hahealo herevadia ta asie abia daeva,  
 bona egu sisiba herevadia iboudiai e  
 dadaraidiava;
- <sup>31</sup> taunabunai edia kara huahuadia bae ani,

bona lalodia na lalo-hadai ese e hahonudia  
vaitani.

- <sup>32</sup> Badina be asi aonegadia taudia na edia raka-muri ese e hamasediamu,  
bona kavakava taudia na edia mata-lahui ese e habuadia tarimu;
- <sup>33</sup> to e hakala henigumu tauna baine noho hedai;  
baine noho namonamo, dika garina basine gari.

## 2

- <sup>1</sup> Natugu e, egu hereva boma abi dae,  
egu hahegani boma lalodia bada;
- <sup>2</sup> taiamu ese aonega bema hakede henia,  
bona lalomu ese lalo-parara bema ura henia;
- <sup>3</sup> oibe, lalo-dobu boma noilaia,  
bona lalo-parara boma boilaia;
- <sup>4</sup> boma tahua, *silver* na heto;  
boma tahua goada, e hehunimu kohudia namodia na heheto;
- <sup>5</sup> bena Iehova igari-henina ba diba,  
bona Dirava idibana ba davaria.
- <sup>6</sup> Badina be Iehova ese aonega e henimu,  
ia uduna amo aonega bona lalo-parara na e maimu;
- <sup>7</sup> ia ese aonega namona e habouamu, kara maoro-maoro taudia edia;  
ia na dala momokanina ai e rakamu taudia edia kesi;
- <sup>8</sup> hahemaoro ġoevaġoева daladia e gimadiamu,  
bona ena helagħa taudia edia dala e nariamu.
- <sup>9</sup> Bena kara maoromaoro bona hahemaoro ġoevaġoева ba diba,  
bona ahu korikori ihenina bona dala namodia iboudiai danu

- <sup>10</sup> badina be aonega na oi lalomu ai baine vareai,  
     bona laumamu ese lalo-parara baine moale-  
     laia;
- <sup>11</sup> kara-balahreni ese baine narimu,  
     lalo-parara ese baine gimamu,
- <sup>12</sup> dala dikana amo baine hamaurimu,  
     hereva gageva-gageva taudia edia amo danu.
- <sup>13</sup> Idia ese kara maoromaoro daladia e rakatan-  
     imu,  
     dibura daladia ai e rakamu;
- <sup>14</sup> kara dika ikaradia e moalelaiamu,  
     bona kara dika ena dala gageva-gagevana e  
     lalo namo heniamu;
- <sup>15</sup> idia na dala gagevadia ai e rakamu taudia,  
     edia raka daladia na dia mamaoro-mamaoro.
- <sup>16</sup> Lebulebu hahinena ena amo baine harohomu  
     mauri,  
     bona ariara hahinena ena hedibağani hereva-  
     dia amo danu.
- <sup>17</sup> Ia ese eregabena ai e bamoava tauna na e  
     rakataniamu,  
     bona ena Dirava ena taravatu e reaiamu;
- <sup>18</sup> badina be ena rumu na mase idiho-henina  
     gabuna,  
     bona ena dala na mase laumadia edia gabu ai  
     e dihomu;
- <sup>19</sup> e lao heniamu taudia na ta se lou maimu,  
     mauri daladia asie davaridia loumu.
- <sup>20</sup> Taunabunai taunimanima namodia edia dala ai  
     ba raka,  
     bona kara maoromaoro taudia edia dala ba  
     badinadia.
- <sup>21</sup> Badina be kara maoromabro taudia na tano bae  
     noholaia,

bona lalo-maoromaoro taudia na ia lalonai  
 bae noho;  
 22 a kara dika taudia na tano amo bae henege  
 daure,  
 bona kara hegui-hegui taudia na tano amo  
 bae herāga oho.

### 3

- <sup>1</sup> Natugu e, egu hahediba herevadia basio lalodia  
 boio,  
 lalomu ese egu hahegani baine badinadia;
- <sup>2</sup> badina be idia ese emu mauri dinadia bae hadau-  
 daudia,  
 bona idia ese emu mauri lagānidia bae haho-  
 hodia,  
 bona āgau namodia momo bae henimu.
- <sup>3</sup> Hebogahisi bona heabidadama basio negedia,  
 a aiomu ba āgēlalaia  
 bona lalomu ai ba toredia.
- <sup>4</sup> Unu amo lalo-namo bona lalo-parara ba  
 davaridia,  
 Dirava bona taunimanima vairadai.
- <sup>5</sup> Iehova bavabidadama henia mai lalomu idoinai;  
 sibomu emu lalo-parara basio abidadama he-  
 nia.
- <sup>6</sup> Emu dala iboudiai lalodai ia bavabia dae,  
 bena ia ese emu dala baine hamaoromaoro-  
 dia.
- <sup>7</sup> Sibomu emu aonega basio heāgilaia;  
 Iehova garina ba gari,  
 bona dika amo ba raka oho.
- <sup>8</sup> Una na hidiomu ihamaurina,  
 bona turiamu ihagoedadia.

- <sup>9</sup> Emu kohu amo Iehova ba hanamo,  
     bona emu uma ġaudia iboudiai anidia roboa-  
     dia amo danu;
- <sup>10</sup> bena emu roge na bae honu honu dae,  
     bona vine ranuna na emu vine ibulolaina  
     urodia amo baine hepurai dobi.
- <sup>11</sup> Natugu e, Iehova ena mata-hakani basio  
     dadaraia,  
     bona ena sisiba basio hesikulaia;
- <sup>12</sup> badina be Iehova ese e lalokau heniamu tauna  
     na e sisiba heniamu,  
     tama ta ese natuna, e lalo namo heniamu  
     merona, na e sisiba heniamu heğereğerena.
- <sup>13</sup> Aonega e davariamu tauna na namo,  
     bona lalo-parara e abiamu tauna danu;
- <sup>14</sup> badina be aonega ena amo e heabimu ahuna ese  
     silver ena amo e heabimu ahuna na e herea-  
     iamu,  
     bona davana ese *gold* e hereaiamu.
- <sup>15</sup> Ia davana ese herahera nadidia davadia e here-  
     adiamu,  
     bona o ura henimu ġaudia ta na ia ida basie  
     heğereğere.
- <sup>16</sup> Mauri daudauna na ia imana idibana ai;  
     taġa bona heimodai na ia imana laurina ai.
- <sup>17</sup> Ena dala na moale daladia;  
     ena dala iboudiai na maino daladia.
- <sup>18</sup> Ia na mauri auna, e dabaia taomu taudia ediai;  
     e dogoa taomu taudia na moale taudia e  
     gwauraidiamu.
- <sup>19</sup> Iehova ese aonega amo tanobada e hadaia,  
     lalo-parara amo guba e karaia;

- 20 iena diba-bada dainai gadobada na e aru dae,  
     bona ori ese hunu e hadihoamu.
- 21 Natugu e, aonega namona bona kara balaheni  
     ba badinadia;  
     oi matamu ese basie readia;
- 22 bena idia ese laumamu bae hamauria,  
     bona aiomu bae heralaia,
- 23 bena emu dala ai ba raka mai namomu ida,  
     bona aemu na basine hetutuhi.
- 24 Boma helai diho, basioma gari;  
     boma hekure diho, emu mahuta bema gaiho.
- 25 Hahetaku ġauna garina basio gari,  
     eiava kara dika taudia ihabua-taridia baine  
     kau negana ai danu basio gari;
- 26 badina be Iehova na emu abidadama,  
     ia ese oi aemu baine naria, basine heidoa.
- 27 Ihanamona na mai badina bae abia taudia edia  
     amo basio rua,  
     ba henidia diba negana ai.
- 28 Dekemu tauna basio hamaoroa, basioto  
     “Aola, ma ba lou mai, kerukeru baina hen-  
     imu”,  
     a ġau be dekemu ai e miamu.
- 29 Dekemu tauna ihadikana dalana basio laloa  
     hata,  
     ia na badibadimu ai e nohomu,  
     bona e abidadama henimumu.
- 30 Tau ta basio lodu henia kava,  
     ia ese se hadikamu negana ai.
- 31 Taiġa dika tauna basio vaġeġe henia,  
     ena dala ta basio abia hidi;
- 32 badina be kara heġui-heġui tauna na Iehova ese  
     e inai henia badamu,

- a kara maoromaoro taudia na ia ese e  
abidadama henidiamu.
- <sup>33</sup> Iehova ese kara dika tauna ena ruma e  
uduguiraiamu;  
a kara maoromaoro tauna ena ruma ia ese e  
hanamoamu.
- <sup>34</sup> Heihi-ihirai taudia na ia ese e ihi-ihiraidiamu;  
a manau taudia na ia ese e lalo namo henidi-  
amu.
- <sup>35</sup> Aonega taudia davadia na heimodai,  
a kavakava taudia na bae hahemaraidia.

## 4

- <sup>1</sup> Natu e, tama ena hahediba herevadia ba ka-  
monai;  
ba hakede henia, bena lalomui bae parara;
- <sup>2</sup> badina be hahediba herevadia namodia vada na  
henimui;  
egu hahediba na basio rakatania.
- <sup>3</sup> Merogu ai lau danu mai tamagu,  
marāgigu ai sinagu ese e lalokau henigu bada;
- <sup>4</sup> una negana ai tamagu ese e hadibagu, eto:  
Egu hereva na lalomu ai ba dogodia tao  
tarika-tarika;  
egu hahegani ba badinadia, bena ba mauri.
- <sup>5</sup> Basio helalo boio; udugu herevadia amo  
basio raka muri.  
Aonega bavabia, lalo-parara bavabia;
- <sup>6</sup> basio rakatania, bena ia ese baine narimu;  
ba ura henia, bena ia ese baine gimamu.
- <sup>7</sup> Aonega matamana binai: aonega bavabia;  
dahaka dahaka bavabi, to lalo-parara basio  
reiaia.
- <sup>8</sup> Ba laloa bada, bena ia ese baine heatolaimu;  
ba rosia, bena ia ese baine imodaimu.

- <sup>9</sup> Herahera āgauna namona na oi kwaramu baine havavalalaia;  
havava āgauna mai hairaina baine henimu.
- <sup>10</sup> Natugu e, a kamonai; egu hereva bavabi dae,  
bena emu mauri lağanidia bae hoho.
- <sup>11</sup> Aonega dalana vada na hadibalaimu;  
kara maoromaoro daladia ai vada na hakaumu.
- <sup>12</sup> Ba raka negana ai aemu basine hekwakwanai;  
boma heau, basioma hetutuhi.
- <sup>13</sup> Hahediba ba dogoa tao, basio kahua nege;  
ba gimaia, badina be ia na emu mauri.
- <sup>14</sup> Kara dika taudia edia dala ai basio raka vareai,  
kara havara taudia edia dala ai basio raka;
- <sup>15</sup> ena amo ba siri, basio rakalaia;  
ena amo ba raka oho, ba rakaia hanai.
- <sup>16</sup> Badina be basie mahuta diba ela bona kara  
kerere tavada bae karaia;  
mahuta ai bae dabu ela bona tau ta vada bae hahekawhanaia.
- <sup>17</sup> Badina be e aniamu āgauna na kara dika,  
bona e inuamu āgauna na dağedağe.
- <sup>18</sup> A kara maoromaoro taudia edia dala na daba  
matana na heto;  
diarina na e bada e laomu ela bona dina e taramu.
- <sup>19</sup> Kara dika taudia edia dala na dibura masemase  
na heto,  
asi dibadiahaka āgau ai e hetutuhimu.
- <sup>20</sup> Natugu e, egu hereva ba hakede henidia;  
taiamu a hakala, egu hereva ba kamonai.
- <sup>21</sup> Oi vairamu amo basie boio,  
oi lalomu ai ba baladia hen.

- <sup>22</sup> Badina be idia na mauri, e davaridiamu tauna  
enai;  
idia na ia hidiona idoinai ihamaurina.
- <sup>23</sup> Lalomu ba gimaia tarika-tarika,  
badina be iena amo mauri e lohilohiamu.
- <sup>24</sup> Hereva gageva-gagevadia na emu amo bavato  
siri;  
hereva koikodia na emu amo ba nege daure.
- <sup>25</sup> Matamu na vairamu kahana bae roha henia;  
vairamu kahana do ba raraia tao.
- <sup>26</sup> Aemu daladia nahuadia ba toho,  
bena emu dala iboudiai bae momokani.
- <sup>27</sup> Basio heau mageva, idiba kahana amo eiava  
lauri kahana amo;  
aemu na kara dika amo bae raka siri.

## 5

- <sup>1</sup> Natugu e, egu aonega ba hakede henia,  
taiamu ba hakala, egu lalo-parara enai;
- <sup>2</sup> kara balaheni ba badinaia  
bona bibinamu ese aonega bae gimaia totona.
- <sup>3</sup> Badina be bada-ranuna na lebulebu hahinena  
bibinana amo e hetuturu dobimu,  
bona ena hereva digarana ese dehoro di-  
garana e hereaiamu;
- <sup>4</sup> a dokona ai ia na idita, muramura iditana na  
heto;  
bona mai ganona, isena ruaosi e segedia  
darena na heto.
- <sup>5</sup> Aena ese mase e diho heniamu,  
mase gabuna e lao heniamu dalana ai e  
rakamu;
- <sup>6</sup> mauri dalana nahuana na se tohoamu;  
e raka kava raka kavamu, to ena dala asi  
dibana.

- <sup>7</sup> Natu e, a kamonai henigu;  
udugu herevadia basio rakatanidia.
- <sup>8</sup> Hahine үнүхетомана na dauhai ba rakaia  
hanai,  
ena ruma iduarana basio raka henia kahi;
- <sup>9</sup> ikwahimu na haida ese bae abi  
bona emu mauri lagānidia na asi edia hebo-  
gahisi taudia ese bae abi oho na garina;
- <sup>10</sup> idau taudia ese oi goadamu amo bae goada  
bona emu hekwarahi anina ese idau tauna  
ena ruma baine hanamo na garina;
- <sup>11</sup> ela bona emu mauri dokona ai ba ġanaġana,  
gorere ese hidiomu bona tau-animu baine ha-  
ore negana ai.
- <sup>12</sup> Una negana ai baoto: Mata-hakani na inai heni-  
ava,  
bona lalodu ese sisiba herevadia e dadaraidi-  
ava;
- <sup>13</sup> e hadibagu taudia eredia asina kamonaiva,  
bona egū hahediba taudia asina hakala heni-  
diava;
- <sup>14</sup> mokona na dika vaitani  
hebou taudia bogaragidiai.
- <sup>15</sup> Sibomu emu ranu gabuna amo,  
sibomu emu ranu gurina amo,  
ranu ba inua.
- <sup>16</sup> Emu ranu baine lohilohi rohoroho  
eiava ariara ai baine aru lao a?
- <sup>17</sup> Lasi, baine mia sibomu emu;  
idau taudia ida basie inua hebou.
- <sup>18</sup> Emu ranu lohilohina baine namo;  
eregabemu ai o adavaia hahinena na ba  
moalelaia.
- <sup>19</sup> Ia na dia hahinena namo-hereana na heto,

- eiava-miara raho-namona na heto.  
 Ena lalokau ba moalelaia nega iboudiai;  
     ena uraheni ese lalomu baine hahonua hanai-  
     hanai.
- <sup>20</sup> Natugu e, anina be dahaka lebulebu hahinena  
     boma ura henia lalo-dika?  
 Badina be dahaka anara hahinena ba rosia?
- <sup>21</sup> Badina be tau ta ena kara na Iehova ese e  
     itadiamu;
- Iehova ese ena dala iboudiai e itadia taomu.
- <sup>22</sup> Kara havara tauna na ena kara havara ese e  
     idoaiamu,  
     ena kara dika ese e ġuiamu.
- <sup>23</sup> Matana asi ihakanina dainai e masemu;  
     ena kavakava bada-herea dainai e boiomu.

## 6

- <sup>1</sup> Natugu e, dekemu tauna dainai boma gwau  
     hamata,  
     eiava idau tauna dainai boma gwau guna,
- <sup>2</sup> eiava bibinamu reġedia ese bema idoamu,  
     eiava udumu herevadia ese bema hahekwick-  
     wanaimu,
- <sup>3</sup> natugu e, ini boma kara toma, sibomu boma  
     hahemauri,  
     badina be oi na dekemu tauna imana ai:  
     aola haraġa, dekemu tauna ba noia.
- <sup>4</sup> Matamu basie mahuta,  
     matamu kopidia basie kapu;
- <sup>5</sup> ba roho mauri, uda nanina ese labana tauna  
     imana amo  
     eiava manu ese manu-tahu tauna imana amo  
     e roho maurimu na heto.
- <sup>6</sup> Lahedo taumu e, dimairi ba lao henia;  
     ena kaura ba laloa, bena aonega ba davaria.

- <sup>7</sup> Ia na asi lohiana, asi biaguna, asi pavapavana,  
<sup>8</sup> to lahara negana ai ana aniani e abimu,  
 bona taboro negana ai e haboumu.
- <sup>9</sup> Lahedo taumu e, ba hekure ela bona edena nega  
 ai?  
 Edena nega ai emu mahuta amo ba noga?
- <sup>10</sup> Matamu ba taia, ba laġa ani sisina,  
 nega sisina kwaramu na imamu ai ba hahek-  
 winaia;
- <sup>11</sup> bena ogōġami ese baine abimu, dadidadi tauna  
 na heto,  
 bona dabu na emu ai baine kau, tuari tauna  
 na heto.
- <sup>12</sup> Kara kava tauna, kara dika tauna,  
 e loa eva-evamu mai hereva gageva-  
 gagevana ida;
- <sup>13</sup> matana e hakunumaiamu, aena amo tano e  
 dadaroamu,  
 bona dodoriana e duduiamu;
- <sup>14</sup> lalona gageva-gagevana amo kara dika e laloa  
 hatamu,  
 heiриheiри e havaraia louloumu.
- <sup>15</sup> Taunabunai hahedika ese baine halahuia;  
 mata-kunumai tamona ai baine dika,  
 ta basine hamauria diba.
- <sup>16</sup> Ĝau tauratoi Iehova ese e inai henidiamu,  
 ĝau hitu ia ese e badulaidiamu:
- <sup>17</sup> hekokoroku matadia, koikoi malana,  
 bona asi ena kerere tauna rarana e hahe-  
 bubuamu imadia;
- <sup>18</sup> lalo-hadai dikadia e lalo hatamu lalona,  
 bona kara dika e heau heniamu aedia;

- <sup>19</sup> hahebade koikoi tauna, koikoi herevadia mo e  
gwauraimu,  
bona heiri-heiri na tadikaka bogaragidiai e  
havaraiamu tauna.
- <sup>20</sup> Natugu e, tamamu ena hahegani ba badinaia,  
bona sinamu ena hahediba herevadia basio  
rakatanidia.
- <sup>21</sup> Nega idoinai lalomu ai ba ġguidia,  
bona aiomu ai ba taudia dae.
- <sup>22</sup> Ba raka negana ai bae hakaumu;  
ba hekure negana ai bae gimamu;  
ba noga negana ai bae hereva henimu.
- <sup>23</sup> Badina be hahegani na lamepa,  
bona hahediba na diari,  
bona mata-hakani na mauri dalana.
- <sup>24</sup> Idia ese hahine dikana ena amo bae hamau-  
rimu,  
bona ariara hahinena malana gaihona amo  
danu.
- <sup>25</sup> Ia hairaina na lalomu ai basio ġahusia,  
bona nahuamu ba tohoa, matana rauna ese  
baine idoamu na garina;
- <sup>26</sup> badina be ariara hahinena na flaoa igabu ta bae  
davalaia,  
a heuda-hanai hahinena ese tau ta ena mauri  
e rau heniamu.
- <sup>27</sup> Tau ta ese lahi na kemena ai bema abia loaloa,  
ena dabua basinema ara a?
- <sup>28</sup> Eiava tau ta ese gida latadiai bema raka,  
aena basinema haraka a?
- <sup>29</sup> Dekena tauna adavana dekenai e raka  
vareaimu tauna na unuheto;  
enai e daukaumu tauna ta na mata-hakani  
amo basine roho mauri.
- <sup>30</sup> Hitolo dainai aniani baine henaoa tauna na

- taunimanima ese bae ihi-ihiraia ani?
- <sup>31</sup> A bema davaria, ia na dava baine henihahitu;  
    ena rumahohuna idoinai baine henihahitu.
- <sup>32</sup> E heuda hanaimu tauna na asi darana;  
    ia na sibona e healamu;
- <sup>33</sup> bero bona hedadarai baine abi,  
    ena hemarai na basine heroho.
- <sup>34</sup> Badina be mama ese tau ta lalona e habaduamu;  
    dava iabina negana ai, ia na asi ibogahisina.
- <sup>35</sup> Heaiva kohuna basine abia;  
    bona herahia momo amo ia lalona basio  
        hakerua diba.

## 7

- <sup>1</sup> Natugu e, egu hereva ba badinadia,  
    bona egu hahegani na emu kohu ai ba halao-  
        dia.
- <sup>2</sup> Egu hahegani ba badinadia, bena ba mauri;  
    egu hahediba herevadia ba naridia,  
    matamu nadinadina o nariamu na heto;
- <sup>3</sup> kwakikwakimu ai ba hiridia kau;  
    lalomu ai ba toredia.
- <sup>4</sup> Aonega ba hamaoroa, baoto “Oi na taihugu”;  
    lalo-parara na turamu korikori ai ba halaoa.
- <sup>5</sup> Ia ese lebulebu hahinenena ena amo baine hamau-  
        rimu,  
    bona ariara hahinenena ena hereva gaihodia  
        amo danu.
- <sup>6</sup> Egu rumahohuna gaba-mauruna badibadinai na gini,  
    maka-maka amo na igo lasi;
- <sup>7</sup> asi aonegadiahautia bogaragidiai, eregabe bog-  
        aragidiai,  
    eregabe tauna ta na itaia, asi darana;
- <sup>8</sup> una hahine ena ariara daigunina e raka heniava,  
    ena rumahohuna lao dalana ai e rakava,

- <sup>9</sup> dina e kerekereva ai, dina e dihova ai,  
hanua e boiva ai, dibura e kauva ai.
- <sup>10</sup> A itaia, hahine ta ia ida e hedavarimu;  
ita-itana na ariara hahinena, lalona na  
gageva-gageva;
- <sup>11</sup> e hereva momomu, e kara kavamu,  
e loa eva-evamu;
- <sup>12</sup> nega haida ariara ai, ma nega haida hoihoi  
gabuna ai,  
ariara daigunidia iboudiai e banimu.
- <sup>13</sup> Ia ese una eregabe tauna e rosiamu, e  
harahuamu,  
mai kirina ida e hereva heniamu, e tomu:
- <sup>14</sup> Egu boubou ġaudia vada na hahelagadia,  
hari dina ai egu gwauhamata davadia vada  
na hen;
- <sup>15</sup> taunabunai vada na raka lasi, ihedavari-  
henimu totona,  
mai moalegu ida baina tahumu totona;  
bona vada name davarimu.
- <sup>16</sup> Egu mahuta patana ai dabua vada na tahoa,  
dabua aukadia Aigupto amo, mai hairaidia;
- <sup>17</sup> egu mahuta ġauna na muramura mai bonadia  
amo vada na kwadia,  
muro bona aloe bona kinamono.\*
- <sup>18</sup> Aoma, baita eno bou rani,  
baita heura heheni mai moaleda ida.
- <sup>19</sup> Badina be adavagu na lasihia,  
ia na dala daudauna ai vada e halaolao;
- <sup>20</sup> ia ese moni vainana ta e abia kau,  
hua baine idoi negana ai baine lou mai.

---

\* **7:17** Muro; Aloe; Kinamono. Ini na Heheru taudia edia muramura mai bonadia haida iadadia.

- <sup>21</sup> Hedibaḡani herevadia momo amo lalona e ani-amū,  
 ena hereva gaihodia amo lalona e hauraiamu.
- <sup>22</sup> Vadaeni, ia murina amo e laomu,  
 boromakau na ialana gabuna e laomu na heto;  
 eiava dia na heto, idoa ese e idoaiamu,
- <sup>23</sup> ela bona diba ese bogana e gwadaiamu;  
 eiava manu na heto, rikiriki e roho heniamu,  
 asi dibana ena mauri e negeamu.
- <sup>24</sup> Natu e, a kamonai henigu;  
 udugu herevadia ba hakala henidia.
- <sup>25</sup> Lalomu na basine raka siri una hahine ena dala ai,  
 ena dala lalodai basio raka lao;
- <sup>26</sup> badina be vada e aladia taudia na hutuma;  
 oibe, vada e aladia mase taudia iboudiai na hutuma herea.
- <sup>27</sup> Ena ruma na mase gabuna dalana,  
 bona mase rumadia e diho henidia laomu.

## 8

- <sup>1</sup> Aonega na se boiboimu a?  
 Lalo-parara ese gadona se habadaiamu a?
- <sup>2</sup> Dala badina ororodia ai bona dala lalodai e ginimu;  
<sup>3</sup> hanua ikoukoudia badibadidiae  
 bona ruma iduaradia ai e boiboimu, e tomu:
- <sup>4</sup> Taunimanima e, na boi henimuimu;  
 taunimanima natudia e, na tai henimuimu.
- <sup>5</sup> Asi aonegamui taumui e, nahuamui ba toho;  
 kavakava taumui e, a hakala.

- <sup>6</sup> A kamonai, badina be ġau herea-daedia baina  
herevalai,  
udugu bibinadia herevadia bae maoro-  
maoro;
- <sup>7</sup> badina be udugu na hereva momokanidia baine  
gwaurai,  
udugu bibinadia ese kara dika e inai heni-  
amu.
- <sup>8</sup> Udugu herevadia iboudiai na mamaoro-  
mamaoro;  
ta se hepui, ta se gageva-gageva.
- <sup>9</sup> Iboudiai na hehedinararai, lalona e pararamu  
tauna enai,  
bona mamaoro-mamaoro, aonega e davari-  
amu taudia ediai.
- <sup>10</sup> Egu hahediba herevadia bavabi dae, a dia *silver*;  
aonega bavabia dae, a dia *gold* namo-  
hereana;
- <sup>11</sup> badina be aonega ena namo ese herahera nadi-  
nadinidua edia namo e hereaiamu,  
o ura henimu ġaudia iboudiai na ia ida basie  
heğereğere.
- <sup>12</sup> Lau, aonega, na henahua tohomu,  
bena lalo-parara bona kara-balahreni na  
davaridiamu.
- <sup>13</sup> Iehova igari-henina na dika i'inai-henina;  
hekokoroku bona heägi bona kara dika  
dalana  
bona hereva gageva-agevadia na inai henidi-  
amu.
- <sup>14</sup> Hahealo bona aonega namodia na egu ai,  
lalo-parara bona goada danu.
- <sup>15</sup> Lau daigu ai pavapava e lohiamu,  
bona hanua lohiadia ese taravatu maoro-  
maorodia e gwauraimu

- <sup>16</sup> lau daigu ai pavapava e lohiamu,  
     bona lohia taudia ese tanobada e biaguamu.
- <sup>17</sup> E ura henigumu taudia na na ura henidiamu,  
     bona mai gadodia ida e tahugumu taudia ese  
     e davarigumu.
- <sup>18</sup> Taḡa bona hemataurai na egu ai,  
     mia-hanaihanai kohudia bona ima-lalo-ani  
     negadia danu.
- <sup>19</sup> Lau huahuagu ese *gold* e hereaiamu,  
     *gold* namo-hereana e hereaiamu;  
     lau anigu ese *silver* ġoeva-daena e hereaiamu.
- <sup>20</sup> Kara maoromaoro daladia ai na rakamu,  
     bona hahemaoro ġoevaġoevana ai danu;
- <sup>21</sup> e ura henigumu taudia na hataġadiamu,  
     edia habou-habou rumadia na hahonudi-  
     amu.
- <sup>22</sup> Ena ġaukara matamana ai Iehova ese e karagu,  
     ena kara gunadia matamana.
- <sup>23</sup> Gunaguna negana ai e haginigu,  
     matamana negana ai, tanobada do se vara  
     negana ai.
- <sup>24</sup> Gadobada na do lasi negana ai, ia ese e  
     havaragu,  
     ranu gabudia ai ranu do se lohilohiva negana  
     ai.
- <sup>25</sup> Ororo badadia na oromadia do asie abi,  
     ororo maraġidia na do lasi negana ai,  
     lau e havaragu;
- <sup>26</sup> tanobada mai ena rei gabudia ida do se kara  
     bona tano ġahuna do se karaia matama ne-  
     gana ai.
- <sup>27</sup> Guba e karaia negana ai, lau na unuseni ai,

gadobada hetoadia e karadia heğeğe negana  
ai;

<sup>28</sup> atai ai guba e ha-aukaia  
bona gadobada e halohilohia daeva negana  
ai;

<sup>29</sup> davara hetoana e henia,  
ranuna ese iena haheğani basie tataia utu  
helaoreana,  
bona tanobada badidia toadia e kara negana  
ai.

<sup>30</sup> Una negana ai lau na ia badibadinai,  
ğaukara idibaka tauna na heto;  
dina iboudiai ia ese e moalelaiguva,  
bona lau na ia vairanai na moaleva nega  
idoinai;

<sup>31</sup> ena tanobada mai inoholaina taudia ida,  
taunimanima natudia iboudiai na moale-  
laidiava.

<sup>32</sup> Natugu e, ina harihari a kamonai henigu:  
Egu dala e badinadiamu taudia be nanamo.

<sup>33</sup> Hahediba herevadia ba hakala henidia, bena ba  
aonega;  
basio laloa nege.

<sup>34</sup> E kamonai henigumu tauna na namo;  
dina iboudiai ia ese egu ikoukou ai e gimamu,  
egu iduara ai e henarimu.

<sup>35</sup> Badina be lau e davarigumu tauna ese mauri e  
davariamu,  
bona lalo-namo na Iehova ena amo e abiamu;

<sup>36</sup> a e reagumu tauna na sibona e healamu,  
lau e inai henigumu taudia iboudiai ese mase  
e ura heniamu.

**9**

- <sup>1</sup> Aonega ese ena rumu vada e hadaia,  
ena au-tubua hituosi vada e haginidia.
- <sup>2</sup> Ena vamu vada e aladia mase,  
ena vine ranuna vada e buloa,  
ena pata vada e dabaraia.
- <sup>3</sup> Ena hesiai kekenidia vada e siaidia lao,  
hanua lalonai atai gabudia amo bae boiboi,  
baeto:
- <sup>4</sup> Daika na asi aonegana,  
ia na iniseni ai baine raka vareai.  
Bona asi darana tauna na ia ese e hereva heniamu, e tomu:
- <sup>5</sup> Aoma, egu dabara bavania;  
vine ranuna vada na buloa ba inua;
- <sup>6</sup> lalo-duhu ba rakatania bena ba mauri;  
lalo-parara dalana ai ba raka.
- <sup>7</sup> Ĝonaĝona tauna e sisiba heniamu tauna na bae  
ihi-ihiraia,  
bona kara dika tauna e gwau heniamu tauna  
na bae haberoa.
- <sup>8</sup> Ĝonaĝona tauna basio gwau henia,  
badina be baine inai henimu;  
a aonega tauna ba gwau henia  
bena baine lalokau henimu.
- <sup>9</sup> Aonega tauna ba hadibaia, bena ena aonega ma  
baine bada;  
kara maoromaoro tauna ba hadibaia, bena  
baine diba herea.
- <sup>10</sup> Iehova igari-henina na aonega matamana;  
Helaĝa Diravana idibana na lalo-parara.
- <sup>11</sup> Badina be lau ese emu mauri dinadia baina  
hahohodia;

- emu mauri lağanidia baina hadaudaudia.
- <sup>12</sup> Boma aonega, emu aonega ese baine hanamomu;  
boma ġonaġona, sibomu metauna ba huaia.
- <sup>13</sup> Kavakava hahinena na e udu maurimu;  
ia na mai lebulebuna, asi hemarai dibana.
- <sup>14</sup> Ena rum a iduarana ai e helaimu,  
hanua ena atai gabudia ai e helaimu,
- <sup>15</sup> raka-hanai taudia, edia dala ai e raka maoro-maoromu taudia,  
na e boi henidiamu, e tomu:
- <sup>16</sup> Daika na asi aonegana,  
ia na iniseni ai baine raka vareai.  
Bona asi darana tauna na ia ese e hereva heniamu, e tomu:
- <sup>17</sup> E henaoa ranuna na mai gaihona,  
bona e ania hehunimu anianina mamula na namo.
- <sup>18</sup> A tauna na asi dibana mase taudia na unuseni ai,  
asi dibana una hahine vadivadina na mase ena dobu gabudia ai.

## 10

- <sup>1</sup> Solomon ena hereva lada-isidia:  
Aonega merona ese tamana e hamoaleamu,  
a kavakava merona ese sinana lalona e hahisihsiamu.
- <sup>2</sup> Kara dika amo e abimu kohudia ese namo se habadaiamu,  
a kara maoromaoro ese mase amo e haherauamu.
- <sup>3</sup> Iehova ese kara maoromaoro taudia na edia hitolo ai se rakatanidia,  
a kara dika taudia edia ura dikadika e laodia ahumu.

- <sup>4</sup> Ima manokana ese ogoğami e havaraiamu,  
a ima-lalo-aní tauna imana ese tağá e habada-  
iamu.
- <sup>5</sup> Ĝeīgei negana ai aniani e habouamu merona na  
lalo-parara merona,  
a taboro negana ai e mahuta hedavauhemu  
merona ese hemarai e havaraiamu.
- <sup>6</sup> Kara maoromaoro tauna kwarana ai hahenamo  
na e kaumu,  
a kara dika tauna uduna ai dağedağé e mia  
hehunimu.
- <sup>7</sup> Kara maoromaoro tauna ilalo-taona na mai ha-  
henamona,  
a kara dika tauna ladana baine hogohogo.
- <sup>8</sup> Lalona e aonegamu tauna ese haheğani baine  
badinadia,  
a udu-mauri tauna baine dika vaitani.
- <sup>9</sup> E raka momokanimu tauna na e rakamu mai  
namona ida,  
a e raka gageva-gagevamu tauna na ena  
kerere baine hedinarai.
- <sup>10</sup> Matana e kunumaiamu tauna ese hekwak-  
wanai e havaraiamu,  
a sisiba herevadia igwauraiddia se garimu  
tauna ese maino e havaraiamu.
- <sup>11</sup> Kara maoromaoro tauna uduna amo mauri e  
lohilohiamu,  
a kara dika tauna uduna ai dağedağé e mia  
hehunimu.
- <sup>12</sup> Inai ese heiři-heiri e havaraiamu,  
a lalokau ese kerere iboudiai e ĝovadiamu.
- <sup>13</sup> Lalo-parara tauna bibinana ai aonega e hedi-  
naraimu,  
a lalo-duhu tauna doruna ai na hekwadi auna  
mia.
- <sup>14</sup> Aonega taudia ese edia diba e habadaiamu,

- a kavakava tauna ena udu-mauri ese ha-hedika e mailaiamu.
- 15 Taḡa tauna ena taḡa na ena hanua aukana,  
a ogoḡami taudia na edia ogoḡami ese e hadikadiamu.
- 16 Kara maoromaoro tauna davana be mauri e davariamu,  
a kara dika tawla ahuna be ena dika e habadaiamu.
- 17 Hahediba herevadia e kamonaimu tauna na mauri dalana ai e rakamu,  
a sisiba herevadia e dadaraidiamu tauna na e raka kereremu.
- 18 Inai e huniamu tauna bibinana na e koikoimu,  
bona hahebade herevadia e gwauraimu tauna na kavakava tauna.
- 19 Hereva momo ese kara kerere e havaradiamu,  
a uduna bibinadia e rudiamu tauna na mai aonegana.
- 20 Kara maoromaoro tauna malana na *silver namo-hereana*,  
a kara dika tauna darana na negenege ġauna.
- 21 Kara maoromaoro tauna bibinana ese hutuma e ubudiamu,  
a kavakava taudia na asi daradia dainai e masemu.
- 22 Iehova ena hahenamo ese taḡa e habadaiamu,  
bona lalo-hisihisi sina taina se atoa kaum.
- 23 Kavakava tauna ese kara dika na ena gadara ai e halaoamu,  
a lalo-parara tauna ese aonega karadia e moalelaimu.
- 24 Kara dika tauna ese e garilaiamu ġauna na ienai baine kau,  
a kara maoromaoro tauna ena ura na baine abia.

- <sup>25</sup> Lai gubana e toamu, murinai kara dika tauna na lasihia,  
a kara maoromaoro tauna na e gini hanai-hanaimu.
- <sup>26</sup> Inuinu āgauna iditana mamina taunimanima isedia ai,  
eiava kwalahu hegarana matadia ai,  
kunu-metau tauna na unuheto,  
e siaiamu taudia ediai.
- <sup>27</sup> Iehova igari-henina ese mauri e hadaudauamu,  
a kara dika tauna ena mauri lağanidia bae gadoi.
- <sup>28</sup> Kara maoromaoro tauna ena helaro na moale ai e gugurumu,  
a kara dika tauna na ena helaro ai baine baia.
- <sup>29</sup> Iehova na goada gabuna, kara maoromaoro tauna enai,  
a ia na hahebua-tari, kara dika taudia ediai.
- <sup>30</sup> Kara maoromaoro tauna na basine heabi oho,  
a kara dika taudia na tano ai basie noho.
- <sup>31</sup> Kara maoromaoro tauna uduna amo aonega e lasimu,  
a mala gageva-gagevana na baine heutu oho.
- <sup>32</sup> Kara maoromaoro tauna bibinana na heabi-dae herevadia mai dibana,  
a kara dika taudia ududia na gagageva-gagageva.

## 11

- <sup>1</sup> Metau ihahetohona e hakoikoiamu āgauna na āgau dika-hereana Iehova enai,  
a hahetoho aurina mai momokanina na ia ese e moalelaiamu.
- <sup>2</sup> Hekokoroku e kaumu negana ai, hemarai danu e kaumu,

aonega na manau taudia ediai.

- 3 Kara maoromaoro taudia na edia lalo-maoromaoro ese ehakaudiamu,  
a kara hēguihēgui taudia na edia lalo-gagevagageva ese e habuadia tarimu
- 4 Badu dinana ai tāga na asi hahenamona,  
a kara maoromaoro ese mase amo e hahe-maurimu.
- 5 Asi ena kerere tauna na ena kara maoromaoro  
ese ena dala e hamaoromaoroamu,  
a kara dika tauna na sibona ena dika ese e  
hahekwakwanaiamu.
- 6 Kara maoromaoro taudia na edia kara maoro-maoro ese e hamauridiamu,  
a kara hēguihēgui taudia na edia ura dikadia  
ese e dabaidia taomu.
- 7 Kara dika tauna e masemu negana ai, ena helaro  
danu e masemu,  
bona Dirava asie matauraiamu taudia na edia  
helaro ai e baiamu.
- 8 Kara maoromaoro tauna na ena hekwakwanai  
amo e roho maurimu,  
bena ia gabuna ai kara dika tauna na hekwak-wanai lalonai e vareaimu.
- 9 Dirava se matauraiamu tauna ese ia uduna amo  
ia dekena tauna bema habuaia tari;  
a aonega dainai kara maoromaoro taudia na  
e roho maurimu.
- 10 Kara maoromaoro taudia e noho  
namonamomu negadia ai,  
hanua na e moalemu;
- a kara dika taudia e masemu negadia ai,  
hanua na e moale hisi daemu.
- 11 Kara maoromaoro tauna ena hahenamo here-vadia ese hanua e hanamoamu,

- a kara dika tauna uduna ese e hahegīgia do-bimu.
- 12 Ia dekena tauna e ihi-ihiraiamu tauna na asi darana,  
a lalo-parara tauna na asi reğereğerena.
- 13 Hesivarai loaloa tauna ese hereva hehunidia e hahedinaraimu,  
a lalo-ihunu tauna ese ġau e moia taomu.
- 14 Bema asi ihakaudia, taunimanima na bae keto,  
a hahealo taudia bema hoho, taunimanima edia noho baine namo.
- 15 Idaū tauna dainai e gwau hamatamu tauna ese hisina baine ani,  
a gwauhamata unuhetomadia e inai henimu tauna na basine dika.
- 16 Harihari-bada hahinena na bae matauraia;  
dağedäge taudia na bae tağā.
- 17 Hebogahisi tauna na sibona ena namo e havara-  
iamu,  
a dağedäge tauna na sibona e hahehisimu.
- 18 Kara dika tauna ese dava koikoina e abiamu,  
a kara maoromaoro e hadoamu tauna ese dava momokanina e davariamu.
- 19 Kara maoromaoro ai e gini tutuka-tutukamu tauna na baine mauri,  
a kara dika e ġavaiamu tauna na baine mase.
- 20 Lalo-gagevagageva taudia na Iehova ese e inai henidia hereamu,  
a asi edia kerere taudia na ia ese e moalelaidi-  
amu.
- 21 Ba diba momokani, kara dika tauna na mata-hakani amo basineroho mauri diba;  
a kara maoromaoro taudia hari bae roho mauri.
- 22 Hane-namo asi lalona na  
gold gadeina boroma kurukuruna ai na heto.

- 23 Kara maoromaoro tauna ena ura na namo ai e  
    ḡugurumu,  
    a kara dika tauna ena helaro ese badu e  
    havaraiamu.
- 24 Tau ta ese e henī dudukaumu, to ena taḡa na e  
    bada e laomu;  
    ma ta ese bema henī ḡaudia na se henimu, to ia  
    na e ogoḡamimu.
- 25 Harihari-bada tauna na ena taḡa ma e badamu,  
    bona e dairi-dairimu tauna na bae dairia.
- 26 Uit e ruamu tauna na taunimanima ese e  
    uduguiraiamu,  
    a e hoiamu tauna latanai hahenamo hereva-  
    dia bae gwaurai.
- 27 Namo e tahuā malaka-malakamu tauna ese  
    harihari-bada danu etahuamu,  
    a dika e tahuamu tauna ese dika e davariamu.
- 28 Ena taḡa e abidadama heniamu tauna na baine  
    marai,  
    a kara maoromaoro tauna na baine tubu, rau  
    matamatana na heto.
- 29 Ena ruma taudia e hahekwarahidiamu tauna  
    ahuna na lai;  
    kavakava tauna na aonega tauna ena hesiā  
    tauna ai bainela.
- 30 Kara maoromaoro huahuana na mauri auna,  
    a taravatu itata-utuna ese mauri e abia  
    ohomu.
- 31 Kara maoromaoro tauna ese davana baine abia  
    ina tanobada ai;  
    benaini, kara dika tauna bona kara havara  
    tauna edia kara davadia na daka bada.

## 12

- <sup>1</sup> Mata-hakani e ura heniamu tauna ese aonega e  
    ura heniamu,

- a sisiba e inai heniamu tauna na kavakava.
- <sup>2</sup> Tau namona ese harihari-bada na Iehova ena amo e abiamu,  
a lalo-hadai dikadia tauna na Iehova ese dikana e gwauraimu.
- <sup>3</sup> Kara dika ese tau ta se haginia tutukamu,  
a kara maoromaoro tauna na ramuna basine heraāga.
- <sup>4</sup> Hahine namona na adavana kwarana ihavalaina,  
a adavana e hahemaraiamu hahinena na ia turiana ihamanokana gorerena na heto.
- <sup>5</sup> Kara maoromaoro taudia edia lalo-hadai na mamaoro-mamaoro;  
kara dika taudia edia hahealo na mai hedibaānidia.
- <sup>6</sup> Kara dika taudia edia hereva na rara ihahebubuna totona e banimu,  
a kara maoromaoro taudia ududia ese taunimanima e hamauridiamu.
- <sup>7</sup> Kara dika taudia na e dareremu bena e pukimu,  
a kara maoromaoro tauna ena rumna baine hedai.
- <sup>8</sup> Tau ta bae hanamo ena lalo-maoromaoro dainai,  
a lalo-gagevagageva tauna na bae dadaraia.
- <sup>9</sup> Dagi marāgi tauna sibona dainai e hekwarahimu na namo,  
a sibona lohia e hegwaūraimu to e hitoloamu tauna na dia namo.
- <sup>10</sup> Kara maoromaoro tauna ese ena boromakau e bogia hisimu,  
a kara dika tauna ena hebogahisi na mai daāgedaāgena.
- <sup>11</sup> Ena tano e ruaiamu tauna ese aniani momo baine abia,

- a kara asi anidia e karamu tauna na asi darana.
- 12 Kara dika tauna ena kohoro aukana e hegīgī dobimu,  
 a kara maoromaoro tauna ramuna e hedaimu.
- 13 Kara dika tauna na bibinana edia kerere ese bae idoaia,  
 a kara maoromaoro tauna na hekwakwanai amo e roho maurimu.
- 14 Ena hereva anidia amo tau ta e namo ġugurumu,  
 bona tau ta imana ġaukarana ese e lou heniamu.
- 15 Kavakava tauna ena dala na maoro, ia sibona ena ita-itai,  
 a aonega tauna ese hahealo herevadia e hakala henidiamu.
- 16 Kavakava tauna ena badu e hedinarai haraġamu,  
 a lalo-parara tauna ese heiri-heiri herevadia se lalodiamu.
- 17 E hereva momokanimu tauna ese hereva maoromaorodia e gwaurai hedinaraiamu,  
 a gwaurai-hedinarai koikoi tauna ese hereva koikoidia mo e gwauraimu.
- 18 E hereva haraġa-haraġamu tauna ena hereva na dare e hegwdamuna heto,  
 a aonega tauna malana ese hahemauri e mailaiamu.
- 19 Momokani bibinadia na e mia hanaihanaimu,  
 a koikoi malana na asine mia vanahamu.
- 20 Koikoi na dala dikana, e laloa hatamu taudia lalodia ai;  
 a namo e laloa hatamu taudia ese moale e davariamu.

- <sup>21</sup> Hahedika ta se kaum, kara maoromaoro tau-dia ediai,  
a kara dika taudia e hekwakwanai momomu.
- <sup>22</sup> Hereva koikoidia e gwauraimu bibinadia na  
Iehova ese e inai henidia badamu,  
a e kara momokanimu taudia na ia ese e  
moalelaidiamu.
- <sup>23</sup> Lalo-parara tauna ese ena diba e huniamu,  
a kavakava taudia ese edia kavakava e gwau-raia hedinaraimu.
- <sup>24</sup> E ġaukara malaka-malakamu tauna baine lohia,  
a lahedo tauna na bae haġaukaraia.
- <sup>25</sup> Lalo-hekwarahi ese tau ta e hametauamu,  
a hereva namona ese e hamoaleamu.
- <sup>26</sup> Kara maoromaoro tauna na dika ena amo e  
raka sirimu,  
a kara dika taudia na edia dala ese e hakaudia  
kereremu.
- <sup>27</sup> Lahedo tauna ese dinana basine abia,  
a e ġaukara malaka-malakamu tauna ese taġa  
namo-hereana baine abia.
- <sup>28</sup> Kara maoromaoro dalana na mauri,  
a kerere dalana na mase e lao heniamu  
dalana.

## 13

- <sup>1</sup> Aonega merona ese tamana ena hahediba here-vadia e kamonai henidiamu,  
a ġonaġona tawla ese sisiba herevadia se ka-monaidiamu.
- <sup>2</sup> Uduna anina amo tau namona ese namo e ani-amu,  
a kara heġui-heġui tauna ena ura be daġedaġe.
- <sup>3</sup> Uduna e nariamu tauna ese ena mauri nahuana  
e tohoamu,

a uduna e haḡaia badabadamu tauna na si-  
bona e hahedikamu.

<sup>4</sup> Lahedo tauna lalona e ura dikadikamu, to ḡau ta  
se abiamu;

a e ḡaukara malaka-malakamu tauna na ḡau e  
henia momomu.

<sup>5</sup> Kara maoromaoro tauna ese koikoi e inai hen-  
amu,

a kara dika tauna na ena hemarai karadia  
daidiae e dadaraiamu.

<sup>6</sup> Kara maoromaoro ese dala maoromaorona ai e  
rakamu tauna e gimaiamu,

a dika ese kara dika tauna e hadarereamu.

<sup>7</sup> Tau ta sibona taḡa tauna e hegwauraimu, to asi  
ena ḡau ta;

ma ta sibona ogoḡami tauna e hegwauraimu,  
to ena taḡa na bada.

<sup>8</sup> Tau ta ena mauri ibodohilaina na ena taḡa,  
a ogoḡami tauna na asi ena mauri ibodohi-  
laina ḡauna.

<sup>9</sup> Kara maoromaoro tauna diarina na mai  
moalena,

a kara dika tauna lamepana na baine bodo.

<sup>10</sup> Se henahua tohomu tauna ena ḡadeḡade ese  
heiri-heiri e havaraiamu,

a aonega na sisiba e abia daemu taudia ediae.

<sup>11</sup> E abi kava kohudia na bae ore haraḡa-haraḡa,  
a ena kohu taidia taidia amo e haboumu

tauna ese ena taḡa baine habadaia.

<sup>12</sup> Helaro mai halahena ese lalo-hisihisi e havara-  
iamu,

a e haḡuḡurua urana na mauri auna.

<sup>13</sup> Hereva e dadaraiamu tauna na sibona e ha-  
hedikamu,

- a haheğani e matauraiamu tauna ese davana  
baine abia.
- 14 Aonega tauna ena hahediba herevadia na e  
lohilohia dae maurina,  
mase ena idoa ai basita kau helaoreana.
- 15 Lalo-parara ese lalo-namo e havaraiamu,  
a asi edia heabidadama taudia edia dala na e  
dika vaitanimu.
- 16 Lalo-parara tauna ese ġau iboudiai mai aone-  
gana ida e karamu,  
a kavakava tauna ese ena kavakava e  
heaġilaiamu.
- 17 Gwaukau tauna dikana ese taunimanima na e  
hahekwanaidia dikadikamu,  
a gwaukau tauna mai momokanina ese hahe-  
mauri e mailaiamu.
- 18 Hahediba herevadia se kamonaimu tauna na e  
ogoġamunu bona e hemaraimu,  
a sisiba herevadia e abi daemu tauna na e  
matauraiamu.
- 19 Ura ta anina idavarina na mai gaihona, tau  
lalona ai;  
a dika irakatanina na kavakava taudia ese e  
inai henia badamu.
- 20 Aonega taudia ida e raka heboumu tauna na e  
heaonegamu,  
a kavakava taudia e bamodiamu tauna na  
baine hekwakwanai.
- 21 Hahedika ese kara dika taudia e ġavadiamu,  
a kara maoromaoro taudia ahudia na taġa.
- 22 Tau namona ese garana ahudia e masetanimu;  
a kara dika tauna ena taġa baine mia, kara  
maoromaoro tauna ena.
- 23 Ogoġami tauna ena vahu gunana ese aniani  
momo e havaraiamu

a hahemaoro gageva-gagevana ese iena amo  
e daroa ohomu.

<sup>24</sup> Se hekwadi momomu tauna ese natuna e inai  
heniamu,  
a natuna e ura heniamu tauna ese ia matana  
e hakania balahenimu.

<sup>25</sup> Kara maoromaoro tauna na bogana e kunumu,  
a kara dika tauna na e hitoloamu.

## 14

<sup>1</sup> Aonega ese ena rumu e haginiamu,  
a kavakava ese sibona imana amo e veria  
garimu.

<sup>2</sup> Kara maoromaoro ai e rakamu tauna ese Iehova  
garina egarimu,  
a e raka gageva-gagevamu tauna ese e  
dadaraiamu.

<sup>3</sup> Kavakava tauna ena hereva na ia sibona doruna  
ikwadilaina auna,  
a aonega taudia bibinadia ese bae hamau-  
ridia.

<sup>4</sup> Asi boromakauna gabuna ai, roge na asi anina;  
a boromakau maruanena ena goada ese uma  
anidia e hahohodiamu.

<sup>5</sup> Sivarai momokanina e gwauraia hedinaraimu  
tauna na se koikoimu,  
a sivarai koikoina e gwauraia hedinaraimu  
tauna na e koikoi momomu.

<sup>6</sup> Ğonaǵona tauna ese aonega e tahua kavamu,  
a lalo-parara tauna enai aonega idavarina na  
haraǵa.

<sup>7</sup> Kavakava tauna vairana amo ba raka oho,  
badina be unuseni ai aonega herevadia basio  
davaridia.

- <sup>8</sup> Lalo-parara tauna ena aonega ese ena dala e  
hahedinarai heniamu,  
a kavakava taudia edia kavakava na e  
hekoimu.
- <sup>9</sup> Dirava ese kara dika taudia e dadaraidiamu,  
a kara maoromaoro taudia ese ena lalo-namo  
e moalelaiamu.
- <sup>10</sup> Lalo sibona ese ena idita mamina e dibaiamu,  
bona idau tauna ta na ia ida basie moale  
hebou.
- <sup>11</sup> Kara dika tauna ena ruma baine hegīgi dobi,  
a kara maoromaoro tauna ena kalaga baine  
namo bada.
- <sup>12</sup> Tau ta vairanai dala ita-itana na maoro,  
a dokona na mase e lao heniamu dalana.
- <sup>13</sup> Kiri lalonai tau ta lalona e hisihisimu,  
bona moale dokona na lalo-hisihisi.
- <sup>14</sup> Raka-muri tauna na sibona ena kara hualIuadia  
amo bogana baine kunu,  
bona tau namona na ena kara huahuadia  
amo danu.
- <sup>15</sup> Lalo-duhu tauna ese hereva iboudiai e abi  
daemu,  
alalo-parara tauna ese e rakalaiamu dalana  
na e raraia taomu.
- <sup>16</sup> Aonega tauna na sibona nahuana e tohoamu,  
bona kara dika amo e raka sirimu;  
a kavakava tauna ese haheauka e negeamu,  
bona e mata lahuimu.
- <sup>17</sup> Badu haraǵa tauna na e kara kava kara kavamu,  
a mai darana tauna na e haheaukamu.
- <sup>18</sup> Lalo-duhu taudia ahudia na kavakava,  
a lalo-parara taudia kwaradia na aonega ai e  
havavalaidiamu.
- <sup>19</sup> Kara dika taudia ese kara namo taudia vairadiai  
e igo dihomu;

- bona kara havara taudia danu, kara maoro-maoro taudia ikoukou ai.
- 20 Ogoğami tauna na ia dekena tauna ese danu se ura heniamu,  
a tağā tauna turana na hutuma.
- 21 Ia dekena tauna e dadaraiamu tauna na tau dikana,  
a ogogami taudia e bogadia hisimu tauna na e moaлему.
- 22 Kara dika e lalo hatamu taudia na kekerere ani?  
Kara namo e lalo hatamu taudia ese hebo-gahisi bona heabidadama bae davari.
- 23 Hekwarahi iboudiai na mai ahudia,  
a hereva kava ese dabu e havaraiamu.
- 24 Aonega na aonega taudia kwaradia ivavalaidia ġauna,  
a kavakava na kavakava taudia ihaheralaidia ġauna.
- 25 Hereva momokani e gwaurai hedinaraimu tauna ese mauri e havaraiamu,  
a hereva koikoi e gwauraimu tauna na tao-tore tauna.
- 26 Iehova igari-henina ese kamonai lava-dae e havaraiamu;  
bona kamonai lava-dae tauna natuna ese roho-mauri gabuna baedavaria.
- 27 Iehova igari-henina na e lohilohimu maurina;  
unu amo masc ena idoa ai basita kau.
- 28 Taunimanima hutuma na pavapava hairaina,  
a lohia asi ena orea taudia na vada e baia.
- 29 Ena badu e halahemu tauna na lalo-parara hereana tauna,  
a badu harağā tauna cse kavakava e habada-iamu.
- 30 Lalo-manau ese tau-anina e hamauriamu,

a vaǵeǵe ese turia e hamanokaiamu.

<sup>31</sup> Ogoǵami tauna e hahisiamu tauna ese ia ikarana  
Diravana e ǵonaǵonalaiamu,  
a dabu tauna e bogaia hisimu tauna ese Di-  
rava e matauraiamu.

<sup>32</sup> Kara dika tauna na ena kara dika ese e hahek-  
wakwanaiamu,  
a kara maoromaoro tauna na ena lalo-  
maoromaoro ese baineharohoa mauri.

<sup>33</sup> Aonega na lalo-parara tauna lalonai e miamu,  
a kavakava taudia lalodia ese asie dibaiamu.

<sup>34</sup> Kara maoromaoro ese bese ta e hanamoamu,  
a kara dika ese orea ta e hahemaraiamu.

<sup>35</sup> E kara aonegamu hesiai tauna na hanua pava-  
pavana ese e lalo-namo heniamu;  
a ena badu na hemarai karadia e karamu  
tauna latanai e kaumu.

## 15

<sup>1</sup> Haere manauna ese badu e laoa ahumu,  
a gwau turianki ese badu e havaraiamu.

<sup>2</sup> Aonega tauna malana amo aonega herevadia na  
e hetuturumu,  
a kavakava taudia ududia amo kavakava  
herevadia na e aru lasimu.

<sup>3</sup> Iehova matana ese gabu iboudiai e nenediamu,  
dika taudia bona namo taudia e itadia taomu.

<sup>4</sup> Mala manadana na mauri auna ta,  
a mala gageva-gagevana ese dara doko e  
havaraiamu.

<sup>5</sup> Kavakava tauna ese tamana ena hahediba e  
dadaraiaamu,  
a sisiba herevadia e hakala henidiamu tauna  
na lalo-parara tauna.

- <sup>6</sup> Kara maoromaoro tauna ena rumai na kohu momo,  
     a kara dika tauna ena davari-davari ġaudia ese  
     ena hekwakwanai e havaraiamu.
- <sup>7</sup> Aonega na aonega taudia bibinadia ese e pi-  
     ūamu,  
     a kavakava taudia lalodia na unu asie kara  
     tomamu.
- <sup>8</sup> Kara dika tauna ena boubou ġauna na Iehova ese  
     e ihi-ihiraiamu,  
     a kara maoromaoro tauna ena ġuriġuri na ia  
     ese e moalelaiamu.
- <sup>9</sup> Kara dika tauna ena dala na Iehova ese e ihi-  
     ihiraiamu,  
     a kara maoromaoro e ġavaiamu tauna na ia ese  
     e lalokau heniamu,
- <sup>10</sup> Mata-hakani auka-hereana na dala e rakatani-  
     amu tauna enai;  
     sisiba e inai heniamu tauna na baine mase.
- <sup>11</sup> Mase gabuna bona dobu masemase gabuna na  
     hehedina-rarai, Iehova vairanai;  
     matona, taunimanima lalodia na ienai eme  
     hedinarai ġuġuru.
- <sup>12</sup> Ġonaġona tauna na se uramu bae sisiba henia;  
     ia na aonega tawla dekena basinela.
- <sup>13</sup> Lalo moale na vaira namo ai e hedinaraimu,  
     a lalo hisihisi ese dara doko e havaraiamu.
- <sup>14</sup> Lalo-parara tauna lalona ese aonega e tahuamu,  
     a kavakava taudia ududia ese kavakava e  
     aniamu.
- <sup>15</sup> Hisi e animu tauna ena mauri dinadia iboudiai  
     na didika,  
     a lalo-moale tauna na bogana e kunu hanai-  
     hanaimu.
- <sup>16</sup> Ġau maraġi-maraġina Iehova igari-henina ida ese

- taḡa badana mai hekwakwanaina ida e here-  
aiamu.
- 17 Aniani asi ianimaina lalokau e miamu gabuna  
ai ese  
vamu manoka-manokana heinai-hehenina ai  
e animu na e hereaiamu.
- 18 Badu haraḡa tauna ese heiri-heiri e havara-  
iamu,  
a badu ai e halahemu tauna ese heiri-heiri e  
haumaia tarimu.
- 19 Lahedo tauna ena dala na au ġiniġini ai e  
bubunimu,  
a kara maoromaoro tauna ena dala na dala  
avohana.
- 20 Aonega merona ese tamana e hamoaleamu,  
a kavakava tauna ese sinana e dadaraiamu.
- 21 Asi darana tauna ese kavakava e moalelaiamu,  
a lalo-parara tauna na e raka maoro-  
maoromu.
- 22 Ta se hahealomu negana ai, taunimanima edia  
lalo-hata ġaudia asie tubu namonamomu;  
a hahealo taudia na hoho negana ai na e tubu  
ħoevaħgoevamu.
- 23 Haere maorona ese taunimanima e  
hamoaleamu,  
bona nega korikorina ai e gwauraiamu here-  
vana be daka namo!
- 24 Aonega tauna ena dala ese mauri e dae hen-  
amu,  
mase ena dobu gabuna ai basine kau helao-  
ana.
- 25 Iehova ese hekokoroku tauna ena rumu e veria  
garimu,  
a vabu ena tano hetoadia e gimadiamu.
- 26 Kara diktaudia edia lalo-hadai na Iehova ese e  
inai henidiamu,

- a lalo-ḡoevaḡoева таудия едия hereva na ia ese  
e moalelaimu.
- <sup>27</sup> Mata-ḡaniḡani tauna ese hekwakwanai e  
havaraiamu ena rumtaudia ediai,  
a henitao dikadia e inai henimu tauna na  
baine mauri.
- <sup>28</sup> Kara maoromaoro tauna ese lalona e hadaia  
namonamomu ede baine haere toma,  
a kara dika tauna uduna amo hereva dikadia  
na e aru lasimu.
- <sup>29</sup> Iehova bona kara dika taudia padadia na dau-  
dau,  
a kara maoromaoro tauna ena ġuriġuri ia ese  
e kamonaiamu.
- <sup>30</sup> Mata diaridia ese tau lalona e hamoaleamu,  
bona hari namodia ese turia e ha-aukadiamu.
- <sup>31</sup> Sisiba herevadia namodia e hakala henimu  
tauna na  
aonega taudia bogaragidiai baine noho.
- <sup>32</sup> Hahediba se abi daemu tauna na sibona e  
hedadaraimu,  
a sisiba herevadia e kamonaimu tauna lalona  
na e pararamu.
- <sup>33</sup> Iehova igari-henina na aonega idavarina bad-  
ina,  
bona manau ese heimodai e gunalaiamu.

## 16

- <sup>1</sup> Lalo-hadai be taunimanima edia,  
a mala ena haere na Iehova ena amo.
- <sup>2</sup> Tau ta ena dala iboudiai na ḡoḡoева, ia sibona  
vairanai;  
a Iehova ese lalo e tohodiamu.
- <sup>3</sup> Emu ġaukara idounai na Iehova imana ai bavatoa,  
bena emu lalo-hata ġaudia bae gini hedai.

- <sup>4</sup> Iehova ese ġau iboudiai vada e kara, ta ta mai  
badidia;  
kara dika tauna danu vada e karaia, hekwak-  
wanai negana ena.
- <sup>5</sup> Hekokoroku taudia iboudiai na Iehova ese e inai  
henidia badamu;  
ba diba momokani, idia ta na mata-hakani  
amo basine roho mauri.
- <sup>6</sup> Hebogahisi bona heabidadama daidiae kara dika  
na e herohomu,  
bona Iehova igari-henina ai tau ta na kara  
dika amo e raka ohomu.
- <sup>7</sup> Tau ta ena kara ese Iehova e hamoaleamu ne-  
gana ai,  
ia na inaina ida e herohemainomu.
- <sup>8</sup> Kohu maraġina mai kara maoromaorona ida be  
namo;  
kohu bada-hereadia kara gageva-gagevadia  
ida na dika.
- <sup>9</sup> Tau ta lalona ese ena dala e laloa hatamu,  
a Iehova ese ia aena e hakaudiamu.
- <sup>10</sup> Oru edia hereva na pavapava uduna amo e  
lasimu;  
hahemaoro ai ia uduna na se kereremu.
- <sup>11</sup> Hahetoho ġauna bona metau idavarina ġauna  
maoromaorodia na Iehova ena;  
hahetoho auridia moda ai mimia iboudiae na  
ienā ġaukara.
- <sup>12</sup> Pavapava ese kara dika ikarana e inai henia  
badamu,  
badina be terono na kara maoromaoro ai e  
ginimu.
- <sup>13</sup> Hereva maoromaoro bibinadia na hanua pava-  
pava ese e moaelaidiamu;

- ia ese hereva maoromaorodia e gwauraimu  
tauna na e lalokau heniamu.
- <sup>14</sup> Pavapava ena badu na mase ena gwaukau  
tauna;  
aonega tauna ese lalona baduna baine  
hakerua.
- <sup>15</sup> Pavapava vairana diarina ai na mauri;  
ena lalo-namo na medu gabedia e hadihodi-  
amu dagadagadia na heheto.
- <sup>16</sup> Aonega iabina ese *gold* iabina e hereaiamu;  
lalo-parara abi-hidina ese *silver* iabi-hidula e  
hereaiamu.
- <sup>17</sup> Kara maoromaoro tauna ena dala avohana na  
kara dika amo e raka sirimu;  
ena dala nahuana e tohoamu tauna na sibona  
e hahemaurimu.
- <sup>18</sup> Heāgi ese hahebuatari dalana e lailaiamu;  
hekokoroku ese moru dalana e lailaiamu.
- <sup>19</sup> Ogoōami taudia ida manau ai ba noho be namo;  
heāgi taudia ida dadidadi kohudia ba haridia  
na dika.
- <sup>20</sup> Hereva e kamonaimu tauna ena namo baine  
bada;  
Iehova e abidadama heniamu tauna na e  
moalemu.
- <sup>21</sup> Lalona e aonegamu tauna na lalo-parara tauna  
e gwauraiamu,  
bona hereva namodia ese lalo-ani e habada-  
iamu.
- <sup>22</sup> Aonega na e lohilohiamu maurina, aonega  
tauna enai;  
a kavakava na mata-hakani īauna, kavakava  
taudia ediai.
- <sup>23</sup> Aonega tauna lalona ese ena hereva e hamaoro-  
maorodiamu,

- bona bibinana na lalo-ani herevadia e  
hadibadiamu.
- 24** Hereva manadadia na bada-ranuna na heto;  
gaihona na lauma enai, bona goadana na tau-  
anina enai.
- 25** Tau ta ese dala ta baine haeroa, dala namona na  
heto;  
a ġau be dokona na mase dalana.
- 26** Ĝaukara tauna na bogana helaoreana e ĝaukara  
goadamu;  
ia uduna ese e ha-uraiamu.
- 27** Bonegita tauna ese kara dika e laloa hatamu;  
ena hereva na lahi ġaraġara na heto.
- 28** Lalo gageva-gageva tauna ese heiri-heiri e  
havaraia rohorohomu;  
hemaunu tauna ese e hetura hehenimu tau-  
dia na e hapararadiamu.
- 29** Daġedaġe tauna ese ia dekena tauna e koiamu,  
bona dala dia namo ai e hakauamu.
- 30** Matana e hakunumaiamu tauna ese kara  
gageva-gagevadia e lalo hatamu;  
bibinana e hakapumu tauna ese kara dika e  
havaraiamu.
- 31** Hui buruka na havava ġauna mai hairaina;  
noho maoromaoro dainai e varamu.
- 32** Badu ai e halahemu tauna ese goada tauna e  
hereaiamu,  
bona sibona lalona e biaguamu tauna ese  
hanua ta e hadarereamu tauna na e here-  
aiamu.
- 33** Mari na taunimanima ese e karaiamu,  
a Iehova ese anina e havaraiamu.

## 17

**1** Aniani kakorona asi reġereġe gabuna ai ese

aria badana mai heiri-heirina na e hereaiamu.

- 2** Hesiai tauna e kara aonegamu ese  
ruma biaguna natuna hemarai karadia e  
karamu na baine biagua,  
bona ahuna baine abia, tadiakaka ta na heto.
- 3** Keikei na *silver* ena, bona lahi na *gold* ena,  
bona Iehova ese taunimanima lalodia e toho-  
diamu.
- 4** Kara dika tauna ese dika bibinadia e kamonai  
henidiamu;  
bona koikoi tauna ese mala gageva-gagevana  
e hakala heniamu.
- 5** Ogoğami taudia e ġonaġonalaidamu tauna ese ia  
ikarana Diravana na e ihi-ihiraiamu;  
hahehis i karadia e moalelaiamu tauna ese  
mata-hakani amo basine roho mauri.
- 6** lahu kwaradia ihavavalaidia na tubudia;  
bona memero ihahairaidia na tamadia.
- 7** Hereva ġoevadie na asie heġeregħere kavakava  
tauna uduna ai,  
bona koikoi herevadie danu lohia uduna ai.
- 8** Koikoi henitaona na mea nadina na heto, e hen-  
imu tauna ese unu e laloa tomamu;  
ena kara iboudiai anidia e varamu.
- 9** Dika e gwau taomu tauna ese lalokau e tahuamu,  
a sivarai e piuamu tauna ese hetura e hadika-  
iamu.
- 10** Sisiba herevada tamona ese lalo-parara tauna  
lalona e gwadaia dobumu,  
a hekwadi sinahu-ta ese kavakava tauna asie  
haberoamu.
- 11** Kara dika tauna ese daġedaġe e tahuamu;  
gwaukau tauna mai daġedaġena ida na ia bae  
siai henia.

- 12 Tau ta ese bea hahinena, natuna vada e dadidia  
     āgauna, ida bae hedavari na sisina namo,  
     a kavakava tauna ida bae hedavari na dika  
     herea.
- 13 Tau ta ese dika bema haloua, namo davana,  
     dika ese iena ruma basine rakatania.
- 14 Heatu matamana na ranu ikehona na heto;  
     taunabunai heai do basine vara ai ba raka  
     oho.
- 15 Kara dika tauna maorona baine gwauraia tauna  
     bona kara maoromaoro tauna dikana baine  
     gwauraia tauna  
     raruosi na Iehova ese e inai henidia badamu.
- 16 Badina be dahaka kavakava tauna imana ai  
     aonega ihoilaina davana baine mia,  
     a ia be asi darana?
- 17 Tau ta turana ese nega iboudiai e lalokau hen-  
     amu;  
     bona tadikakana ena lalokau na dika negana  
     ai e hedinaraimu.
- 18 Asi darana tauna ese gwauhamata āgauna e hen-  
     imu;  
     ia dekena tauna vairanai gwauhamata toana  
     ai e laomu.
- 19 Kara dika e ura heniamu tauna ese heiri-heiri  
     danu e ura heniamu;  
     bona ena iduara atai ai e karaiamu tauna ese  
     hahebua-tari e tahuamu.
- 20 Lalo-gagevagageva tauna na ena āgaukara anidia  
     asie varamu,  
     bona malana mai koikoina tauna na hahehis  
     ai e morumu.
- 21 Lalo-duhu merona ese tamana lalona e hahisi-  
     hisiamu;  
     kavakava merona tamana na se moalemu.
- 22 Lalo-moale na muramura namona,  
     a lalo-metau ese turia e hamanokadiamu.

- <sup>23</sup> Kara dika tauna ese koikoi henitaona e abia  
hehunimu,  
hahemaoro ihagagevana totona.
- <sup>24</sup> Lalo-parara tauna ese aonega e hağereamu,  
a kavakava tauna ese tanobada dokodia e  
roha henia laomu.
- <sup>25</sup> Kavakava merona ese tamana lalona e hahisi-  
hisiamu,  
bona e havaraia hahinena lalona e hadika-  
iamu.
- <sup>26</sup> Kara maoromaoro tauna matana ihakanina na  
dia namo;  
lalo-ihunu taudia bae dadabadia na dika.
- <sup>27</sup> Se hereva momomu tauna na mai aonegana;  
se badu-harağamu tauna na mai ena lalo-  
parara.
- <sup>28</sup> Kavakava tauna basine hereva negana ai, bae  
laloa ia na aonega tauna;  
uduna baine hakapua negana ai, baeto ia na  
lalo-parara tauna.

## 18

- <sup>1</sup> E haheidaumu tauna ese sibona ena ura e  
tahuamu;  
lalo-hadai namodia iboudiai e inai henimu.
- <sup>2</sup> Kavakava tauna ese lalo-parara se moalelaiamu;  
ia sibona ena lalo-hadai igwauraina mo e  
moalelaiamu.
- <sup>3</sup> Kara dika e maimu negana ai, heihi-ihirai danu  
e maimu;  
heğonağonalai amo hedadarai e varamu.
- <sup>4</sup> Tau ta uduna herevadia na ranu dobudia na  
heheto;  
aonega na e lohilohiamu, e aru goadagoad-  
amu.
- <sup>5</sup> Kara dika tauna ibeiana na dia namo,

- bona kara maoromaoro tauna idadaraina  
danu dia namo.
- <sup>6</sup> Kavakava tauna bibinana ese heiri-heiri e  
havaraiamu,  
bona uduna ese hedadaba e vaveamu.
- <sup>7</sup> Kavakava tauna uduna na ia ihabua-tarina,  
bona bibinana na ia sibona idoalaina āgau.
- <sup>8</sup> Hemaunu tauna ena hereva na aniani mai gai-  
hodia na heheto;  
idia na boga lalonai e laomu.
- <sup>9</sup> Ena āgaukara ai e lahedomu tauna na  
hahebua-tari tauna tadikakana.
- <sup>10</sup> Iehova ladana na kohoro aukana;  
kara maoromaoro tauna na ia lalonai e heau  
vareaimu bena e maurimu.
- <sup>11</sup> Taāga tauna ena taāga na hanua aukana na heto ia  
ena,  
bona maāgu badana na heto, ia igimana.
- <sup>12</sup> Tau lalona ena heāgi ese hahebua-tari e gunala-  
iamu,  
a lalo-manau ese heimodai e gunalaiamu.
- <sup>13</sup> Tau ta do se kamonai negana ai na e haeremu,  
una na ena kavakava bona ena hemarai.
- <sup>14</sup> Tau ta lalona na gorere ai baine haheauka;  
a dara-doko ai daika baine haheauka?
- <sup>15</sup> Mai darana tauna lalona ese lalo-parara e  
davariamu,  
bona aonega tauna taiana ese lalo-parara e  
tahuamu.
- <sup>16</sup> Tau ta ena herahia āgauna ese ena dala e laila-  
iamu,  
lohia vairadiai e hakaudia vareaimu.
- <sup>17</sup> E hereva gunamu tauna ena hereva mamina na  
momokani,

ela bona ta ma bainema, anina baine tahu  
henia.

<sup>18</sup> Mari ese hepapahuahu e hadokodiamu,  
bona hahemaoro na siahu taudia padadiai e  
karaiamu.

<sup>19</sup> Tadikakana ese e kahaiamu tauna na hanua  
aukana na heto,  
a heiri-heiri na ruma aukana auridia na  
heheto.

<sup>20</sup> Tau ta uduna huahuana amo e hahehonumu;  
bibinana anina amo e hahehonumu.

<sup>21</sup> Mase bona mauri na mala siahuna lalonai  
mimia;  
e ura heniamu taudia ese huahuana bae ani.

<sup>22</sup> Hahine e adavaiamu tauna ese namo e davari-  
amu,

Iehova ena hahenamo e abiamu.

<sup>23</sup> Ogoğami taudia na e noinoimu,  
a tağā taudia na hereva aukadia amo e  
haeremu.

<sup>24</sup> Haida na e hetura koikoimu,  
a hetura korikori tauna ena hedaro-boubou  
ese tadikaka ena hedaro-boubou e herea-  
iamu.

## 19

<sup>1</sup> Ogoğami tauna ena lalo-maoromaoro ai e  
rakamu ese  
kavakava tauna mai ena hereva gageva-  
gagevadia na e hereaiamu.

<sup>2</sup> Tau ta asi aonegana baine noho na dia namo;  
e raka harağā-haragamu tauna ese ena dala e  
reaiamu.

<sup>3</sup> Tau ta ena kavakava ese ena dala e hakererea  
vaitanimu negana ai,  
ia ese Iehova e lalo dika heniamu.

- <sup>4</sup> Taḡa ese hetura taudia matamatadia momo e  
mailaidiamu,  
a ogoḡami tauna na turana ese e rakataniamu.
- <sup>5</sup> Gwaurai-hedinarai koikoi tauna ese mata-  
hakani basine reaia;  
hereva koikoi tauna na basine roho mauri.
- <sup>6</sup> Hutuma ese harihari-bada tauna ena lalo-namo  
e tahuamu,  
bona taunimanima iboudiai na herahia e  
henimu tauna turana.
- <sup>7</sup> Ogoḡami tauna na tadikakana iboudiai ese e inai  
heniamu;  
benaini, turana ese e heautaniamu, dauha e  
laomu;  
e boi henidiamu, to idia na lasihadia.
- <sup>8</sup> Aonega e abiamu tauna na sibona e heura-  
henimu;  
lalo-parara e abia tarika-tarikamu tauna na  
ena namo baine bada.
- <sup>9</sup> Hahebade koikoi tauna ese mata-hakani basine  
reaia;  
bona hereva koikoi tauna na baine mase.
- <sup>10</sup> Kavakava tauna baine noho loḡea na dia namo;  
bona hesiai tauna ese lohia baine biagudia na  
dika herea.
- <sup>11</sup> Lalo-maoromaoro dainai tau ta na badu ai  
baine halahe,  
bona kara dika ilalo-negena na ia hairaina.
- <sup>12</sup> Pavapava ena badu na leona e ḡoumu na heto;  
ena lalo-namo na hunu rei latanai na heto.
- <sup>13</sup> Kavakava merona ese tamana e hadikaia vai-  
tanimu;  
bona hahine ena hepapahuahu na medu e  
hetuturu hanaihanaimu na heto.
- <sup>14</sup> Ruma bona taḡa na tamada edia amo ta abimu;  
a mai darana hahinena na Iehova ena amo.

- 15 Lahedo ese taunimanima e hamahutadia hedavuhemu,  
     bona lahedo tauna na baine hitolo.
- 16 Hahegani e badinaiamu tauna na baine mauri,  
     a hereva e dadaraiamu tauna na baine mase.
- 17 Ogoğami taudia e bogadia hisimu tauna ese  
     Iehova enai e henitorehaimu;  
     Iehova ese ena kara davana do baine henia.
- 18 Natumu matana ba hakania, helaro na doini e  
     miamu negana ai;  
     lalomu basio hadaia ia baine dika.
- 19 Badu dikadika tauna ese davana baine abia;  
     badina be boma hamauria, to ma boma  
     karaia lou.
- 20 Hahealo herevadia ba kamonaidia, hahediba  
     herevadia bavabidiae;  
     unu amo aonega bavabia, nega gabena ena.
- 21 Tau ta ena lalo-hadai na momo,  
     a Iehova ena ura mo baine gini.
- 22 Tau ta enai ta ura heniamu ġauna na  
     heabidadama;  
     ogogami tauna ena namo ese koikoi tauna ena  
     e hereaiamu.
- 23 Iehova igari-henina ese mauri dalana ai e  
     hakauda laomu;  
     ienai e miamu tauna na lalona baine  
     heğereğere,  
     hahedika ta ienai basine kau.
- 24 Lahedo tauna ese imana na dihu ai e dau do-  
     bimu,  
     bona basine abia isi uduna ai.
- 25 Ğonağona tauna ba botai, bena lalo-duhu tau-  
     dia lalodia bae parara;  
     lalo-parara tauna ba sisiba henia, bena ena  
     aonega baine bada.

- <sup>26</sup> Tamana e dağedağe heniamu bona sinana e  
luluamumerona ese  
hemarai bona gwaugwau e havaradiamu.
- <sup>27</sup> Natugu e, hahediba herevadia ikamonaina  
boma hadokoa,  
bena aonega herevadia amo ba raka oho  
danu.
- <sup>28</sup> Gwaurai-hedinarai asi anina tauna ese hahe-  
maoro e ġonaġonalaiamu,  
bona kara dika tauna uduna ese dika badana  
e hadonoamu.
- <sup>29</sup> Ġonaġona taudia davadia na vada e heġaeġaelai;  
bona kavakava taudia dorudia danu bae kwa-  
didia hiruka-hiruka.

## 20

- <sup>1</sup> Vine ranuna na ġonaġona ġauna, kekeru muramu-  
rana na heai ġauna:  
edai e kereremu tauna na asi aonegana.
- <sup>2</sup> Pavapava ena badu mai garina na leona e ġoumu  
na heto;  
e habaduamu tauna ese ena mauri e  
negeamu.
- <sup>3</sup> Heatu amo e raka sirimu tauna na bae imodaia,  
a kavakava taudia iboudiai bae heai.
- <sup>4</sup> Lahedo tauna ese hadohado negana ai tano se  
ruiamu;  
taboro negana ai baine hetahu, a ġau ta basine  
davaria.
- <sup>5</sup> Taunimanima ta ena lalo-hadai na ranu dobuna  
na heto;  
a lalo-parara tauna ese baine veria lasi.
- <sup>6</sup> Taunimanima hutuma ese sibodia edia  
heabidadama egwauraimu,

- a kara momokani tauna na daika ese baine  
davarria diba?
- <sup>7</sup> Kara maorormaoro tauna na ena lalo-  
maoromaoro ai e rakamu;  
ia murinai natuna danu bae namo.
- <sup>8</sup> Hanua pavapavana na hahemaoro gabuna ai  
helaina ai  
ia matana ese dika baine tapoa hidi.
- <sup>9</sup> Daika baine hereva diba, baineto:  
Lalogu vada na hañgoevaia,  
egu dika amo vada name ñgoeva.
- <sup>10</sup> Metau auridia mai koikoidia bona hahetoho  
ñgaudia mai koikoidia,  
ruaosi Iehova ese e inai henidia badamu.
- <sup>11</sup> Mero marañina ena kara amo sibona e hahedi-  
naraimu,  
ena kara na ñgogoëva-ñgogoëva bona mamaoro-  
mamaoro eiava?
- <sup>12</sup> E hakalamu taiana bona e roharohamu matana  
na  
Iehova ese ruaosi vada e karadia.
- <sup>13</sup> Mahuta basio ura henia, ba ogoñami na garina;  
matamu a hapapadia, bena aniani momo  
bavabia.
- <sup>14</sup> Hoihoi tauna na e tomu “Ina na dika, ina na  
dika”,  
beno e raka ohomu mai heañina ida.
- <sup>15</sup> Gold bona dava-bada nadidia na mimia;  
a aonega bibinadia na herahera nadina  
namo-hereana.
- <sup>16</sup> Tau ta ese idau tauna dainai bema gwau  
hamata, ena hahedoki na bavabia;  
bona idau bese taudia daidiae bema gwau  
hamata, iena amo gwauhamata toana bav-  
abia.

- <sup>17</sup> Koikoi amo e abiamu anianina na mai gaihona,  
       iabina tauna uduna ai;  
       a gabeamo ia uduna na miri ai baine honu.
- <sup>18</sup> Hahealo amo lalo-hata e ginimu;  
       hahekau mai aonegana amo ba tuari.
- <sup>19</sup> E hesivarai loaloamu tauna ese hereva hehunida  
       e hahedinaraimu;  
       taunabunai hereva kavakavadia e  
       gwauraimu tauna ida basio hetura.
- <sup>20</sup> Ta ese tamana eiava sinana bema uduguiraia,  
       ena lamepa baine bodo, baine dibura mase-  
       mase.
- <sup>21</sup> Matamana ai e abia haraḡamu ahuna na  
       dokona ai anina namona basine vara.
- <sup>22</sup> Basioto “Dika baina davalalaia”;  
       Iehova ba naria, ia ese baine durumu.
- <sup>23</sup> Metau auridia mai koikoidia na Iehova ese e  
       inai henidia badamu:  
       bona hahetoho ġaudia mai koikoidia na dia  
       nanamo.
- <sup>24</sup> Taunimanima ena raka na Iehova ese e reġuamu;  
       benaini, ena dala ede baine dibaia toma?
- <sup>25</sup> Tau ta baine hereva haraḡa, baineto “Ina na  
       helaḡa”,  
       bena baine gwau hamata murinai baine  
       haeroa,  
       una na idoa ienai.
- <sup>26</sup> Pavapava mai aonegana ese dika taudia na e  
       tapodia hidimu,  
       bona edia dika davadia e henidiamu.
- <sup>27</sup> Taunimanima laumana na Iehova ena lamepa,  
       ia lalona idoinai itahuna.
- <sup>28</sup> Heabilidadama bona kara maoromaoro ese  
       hanua pavapavana na e hamauriamu;

ena terono na hahemaoro ġoevaġoeva ese e ha-  
aukaiamu.

<sup>29</sup> Eregabe taudia hairaidia na edia goada,  
a iahu hairaidia na huidia burukadia.

<sup>30</sup> Hekwadi berodia ese dika e abi ohomu;  
bona hedadaba ese taunimanima lalodia e  
haġoevadiamu.

## 21

<sup>1</sup> Hanua pavapavana lalona na sinavai na heto,  
Iehova imana ai:  
ena ura gabuna e ha-arua laomu.

<sup>2</sup> Tau ta ena dala iboudiai na mamaoro-mamaoro  
ena ita-itā ai;  
a Iehova ese ia lalona e dibaiamu.

<sup>3</sup> Kara maoromaoro bona hahemaoro ġoevaġoeva  
na Iehova ese e abidia dae badamu,  
a boubou ġaudia na e abidia dae maraġimu.

<sup>4</sup> Heaġi matadia bona hekokoroku lalona,  
kara dika taudia edia lamepa,  
unu na didika.

<sup>5</sup> Ĝaukara malaka-malaka tauna ena lalo-hadai ese  
anidia e havara badamu,  
a lalo-haraga taudia iboudiai na bae dabu.

<sup>6</sup> Koikoi malana amo e abimu kohudia na  
ninoa lai ese e odaia ohomu na heto;  
una na mase idoana.

<sup>7</sup> Kara dika taudia na edia daġedāġe ese baine  
darodia oho,  
badina be kara maoromaoro ikarana asie  
uramu.

<sup>8</sup> Kerere tauna ena dala na gageva-gageva,  
a lalo-ġoevaġoeva tauna ena kara na maoro-  
maoro.

<sup>9</sup> Tau ta abikau ai baine noho be namo;

- a hereva momo hahinena ida ruma ai bae  
noho bou na dika.
- 10 Kara dika tauna laumana ese dika e ura heniamu,  
bona dekena tauna se bogaia hisimu.
- 11 Ģonaġona tauna matana e hakaniamu negana ai,  
lalo-duhu tauna lalona e heaonegamu;  
aonega tauna e hadibaiamu negana ai,  
ena lalo-parara e habadamu.
- 12 Kara maoromaoro tauna ese kara dika tauna  
ena ruma e itaia taomu;  
kara dika taudia na e hahebua tarimu.
- 13 Ogoġami taudia edia taitai se hakala henimu  
tauna na  
sibona baine tai lolololo a ta basine kamonai.
- 14 Herahia ġauna e henihenimiu ese badu e laoa  
ahumu;  
bona koikoi henitaona e henihenimiu ese  
badu aukana e hamanokaiamu.
- 15 Hahemaoro ġoevaġoevana ese kara maoromaoro  
taudia na e hamoalediamu,  
a kara dika taudia na kudoudia e hahetahadiamu.
- 16 Lalo-parara dalana amo e raka ohomu tauna  
ese  
mase taudia edia hebou ai baine noho.
- 17 Moale-kava e ura heniamu tauna na baine  
ogoġami;  
bona vine ranuna bona dehoro e ura henidiamu  
tauna na basine taġa.
- 18 Kara dika tauna na kara maoromaoro tauna  
ibodohilaina,  
bona kara koikoi tauna ese kara momokani  
tauna e bodoħiamu.
- 19 Tau ta tano ġaġaena ai baine noho be namo,

- a e hereva momomu bona e maumaumu  
hahineni ida baine noho na dika.
- 20 Kohu namo-hereadia bona dehoro na aonega  
tauna ena ruma ai mimia,  
a kavakava tauna ese e ha-orediamu.
- 21 Kara maoromaoro bona hebogahisi e ġavamu  
tauna ese  
mauri bona kara maoromaoro bona  
heimodai e davarimu.
- 22 Aonega tauna ese goada taudia edia hanua  
maġuna amo e dada daemu;  
bona edia ruma aukana, e abidadama henim-  
amu ġauna, e ġiġia dobimu.
- 23 Uduna bona malana e naridiamu tauna na  
hekawwanai amo e roho maurimu.
- 24 Heaġi bona hekokoroku tauna na “gonaġona  
tauna” e gwauraiamu;  
ia na e kara heaġi-heaġimu.
- 25 Lahedo tauna ena ura ese e hamaseamu,  
badina be ia imana na se uramu ġaukara.
- 26 Dina idoinai kara dika tauna na e heġahusimu,  
a kara maoromaoro tauna ese ġau e henimu,  
se rumu.
- 27 Kara dika tauna ena boubou ġauna na dika ro-  
horoho,  
a mai ena lalo-hadai dikana ida e mailaiamu  
negana ai ena dikana bada herea.
- 28 Gwaurai-hedinarai koikoi tauna na baine mase,  
a kamonai tauna ena hereva do baine hesiriu.
- 29 Kara dika tauna ese vairana e ha-aukaiamu;  
a kara maoromaoro tauna ese ena dala e  
haerodiamu.
- 30 Asi aonega ta, asi lalo-parara ta, asi lalo-hadai ta  
ese  
Iehova baine laoa ahu diba.

31 Hosi e heḡaeḡelaiamu, tuari dinana inanatalaina;  
a kwalimu na Iehova enai.

## 22

- <sup>1</sup> Lada namona iabi-hidina ese taḡa badadia iabi-hididia e hereadiamu,  
bona lalo-namo esesilver eiava *gold* e hereadiamu.
- <sup>2</sup> Taga taudia bona ogoḡami taudia na e hegogo heboumu;  
Iehova ese iboudiai e karadia.
- <sup>3</sup> Lalo-parara tauna ese dika e itaiamu, bena e komumu;  
a lalo-duhu taudia na e raka e laomu, bena e hekwakwanaimu.
- <sup>4</sup> Manau bona Iehova igari-henina davadia na taḡa bona heimodai bona mauri.
- <sup>5</sup> Ginigini bona idoa na lalo-gagevagageva tauna ena dala ai mimia;  
a sibona e hegimamu tauna na dauhai baine noho.
- <sup>6</sup> Meromero bema rakalaia dalana na ba hadibal-aia;  
bena baine buruka negana ai basine rakania.
- <sup>7</sup> Taga tauna ese ogoḡami tauna e biaguamu,  
bona abi-torehai tauna ese e henia torehai tauna isiaina e lao heniamu.
- <sup>8</sup> Hahemaoro gageva-gageva e hadoamu tauna ese hahehisni anina baine abia,  
bona ena badu auna na baine kwaidu.
- <sup>9</sup> Ani gaga-isi tauna na bae hanamoa,  
badina be ana aniani na ogoḡami taudia ida e ania heboumu.

- 10 Ġonaġona tauna ba lulua lasi, bena heiri-heiri na  
baine ore,  
bona heai bona gwaugwau bae doko.
- 11 Lalo-ġoevaġoева e ura heniamu bona e hereva  
manadamu tauna na hanua pavapavana  
turana ai bainela.
- 12 Iehovas matana ese lalo-parara e itaia taomu;  
a koikoi tauna ena hereva na ia ese e ġiġi  
dobimu.
- 13 Lahedo tauna na e tomu “Leona ta na murimuri  
ai;  
ariara ai baine alagu mase”.
- 14 Ariara hahinena uduna na guri dobu-hereana;  
Iehova ese e badu heniamu tauna na ia  
lalonai baine moru dobi.
- 15 Kavakava na meromero lalonai mia;  
a mata-hakani auna ese baine lulua lasi  
dauhai.
- 16 Ogoġami taudia edia amo e dadidadimu, sibona  
ena taġa iħabada na totona,  
eiava taġa taudia e harihari henidiamu,  
tauna na do baine dabu mo.
- 17 Taiamu a hakala, aonega taudia edia hereva ba  
kamona idia,  
egu diba na lalomu ai bavabia dae;
- 18 badina be lalomu ai ba dogodia tao,  
bona bibinamu ai bavabidia hata,  
una na moale ġauna.
- 19 Hari dina ai oi vada na hadibalaimumu,  
Iehova bavabidadama henia helaoreana.
- 20 Sisiba bona lalo-parara herevadia  
toi-ahui vada na tore henimu ani,
- 21 kara maoromaoro bona kara momokani  
ihadibalaimu totona,

bona haere maorona na e siaimu taudia ba  
henidia helaoreana?

- <sup>22</sup> Ogoğami tauna basio dadia, badina be ia na  
ogogami;  
hisi e animu taudia na hahemaoro gabuna ai  
basio taodia tao;
- <sup>23</sup> badina be Iehova ese edia gini-kau gabuna ai  
baine durudia,  
bona edia kohu e dadi ohomu taudia na edia  
mauri baine dadi oho.
- <sup>24</sup> Badu harağga tauna ida basio hetura,  
bona badu ġaragħara tauna ida basiola;
- <sup>25</sup> ena dala ba manadalaidia,  
bona sibomu idoa ai ba heidoa na garina.
- <sup>26</sup> Tau ta dainai e gwau hamatamu tauna ai basi-  
ola,  
bona ta ena abitoreħai toana basio hen.
- <sup>27</sup> Idavalaina monina ai boma dabu negana ai  
emu mahuta patana na henumu amo bema  
heabi oho,  
namona be dahaka?
- <sup>28</sup> Tano hetoana gunana, senemu ese e holoa  
ġauna,  
basio raġaia oho.
- <sup>29</sup> Ena ġaukara ikarana mai dibana tauna o itaiamu  
a?  
Ia na pavapava vairadai baine gini;  
asi haridia taudia vairadai basine gini.

## 23

- <sup>1</sup> Pavapava ida bavaniani hebou negana ai,  
vairamu ai ġaudia ba itadia namonamo;
- <sup>2</sup> bema aniani dika taumu,  
bavani heita hen.

- <sup>3</sup> Ena aniani manokadia basio hekise-hekise henidia,  
     badina be idia na hedibağani anianidia.
- <sup>4</sup> Tağa iabina basio hekwarahilaia;  
     a iabina boma hadokoa, boma aonega.
- <sup>5</sup> O roha heniamu negana ai na e pukimu;  
     badina be asi kaimana hanina e hekaramu,  
     bena guba e roho dae heniamu, ugava na  
     heto.
- <sup>6</sup> Asi mata-henina tauna ana basio ania,  
     ena aniani manokadia basio hekise-hekise  
     henidia;
- <sup>7</sup> badina be ia na e helalomu tauna na heto;  
     e tomu “Bavaniani, ba inuinu”,  
     to lalona na dia oiemu ai.
- <sup>8</sup> Aniani ġaudia vada o ani na ba mumuta nege,  
     bona emu lalo-namo herevadia na ba  
     hapetapetalai.
- <sup>9</sup> Kavakava tauna vairanai basio hereva,  
     badina be emu hereva aonegadria na ia ese  
     baine dadarai.
- <sup>10</sup> Tano hetoana gunana basio rağαιa oho,  
     bona ihareha edia tano ai basio raka vareai;
- <sup>11</sup> badina be Ihamauridia Diravana na mai goadana;  
     edia gini-kau gabuna ai baine durudia,  
     oi baine laomu ahu.
- <sup>12</sup> Lalomu ese hahediba baine tahua,  
     bona taiamu ese aonega herevadia bae  
     hakala henidia.
- <sup>13</sup> Mero ta matana ihakanina ai basio daradara;  
     au amo boma kwadia, ia na basinema mase.
- <sup>14</sup> Au amo boma kwadia,  
     bena ia laumana na mase gabuna amo do ba  
     rauaia.

- 15 Natugu e, lalomu bema aonega,  
bena lau lalogu danu bema moale.
- 16 Udumu bibinadia na hereva maoromaorodia  
bae gwaurai negana ai,  
lau laumagu do baine moale.
- 17 Lalomu ese kara dika taudia basine vaǵeǵe henidia,  
a dina idoinai Iehova garina ai ba noho.
- 18 Momokani, vaira dinadia dounu,  
bona emu helaro na basine doko.
- 19 Natugu e, a kamonai, bena ba aonega;  
lalomu na dala namona ai ba hakaua.
- 20 Vine ranuna e inu momomu taudia ida basio inu  
hebou,  
bona e ani lavadaemu taudia ida basio aniani  
hebou;
- 21 badina be kekerø tauna bona ani-lavadae tauna  
na bae ogogami;  
bona mahuta momo ese tau ta dabua hedaredia  
baine hadabualaia.
- 22 Tamamu, e havaramu tauna, na ba kamonai  
henia;  
bona sinamu na e burukamu negana ai basio  
dadaraia.
- 23 Hereva momokani ba hoia emu, bona haida  
edai ma basio hoihoilaia;  
aonega bona hahediba bona lalo-parara na  
ba hoidia emu.
- 24 Kara maoromaoro tauna tamana baine moale  
hisidæ;  
bona natuna mai aonegana e havaraiamu  
tauna ese baine moalelaia.
- 25 Tamamu bona sinamu na ba hamoaledia;  
e havaramu hahinena ba hamoalea hisidæ.

- 26 Natugu e, lalomu ba henigu;  
matamu ese egu dala do bae ita.
- 27 Badina be anara hahinena na guri dobuna;  
lebulebu hahinena na ranu gurina hekahih-  
hekahina.
- 28 E bani taomu, dadidadi tauna na heto;  
koikoi taudia e hahutumadiamu.
- 29 Daika etomu “Inaio”? Daika e tomu “Madi  
ihabaigu”?  
Daika e heaimu? Daika e maumaumu?  
Daika na asi badina vada e bero?  
Daika matana eme kakakaka?
- 30 Vine ranuna e inu daudaumu taudia,  
bona vine ranudia idau-idau e bulodiamu  
bena e inu tohomuta udia.
- 31 Vine ranuna e kakakakamu negana ai,  
kehere ai e kimore-kimoremu bona inuna ai  
e manada-manadamu negana ai,  
basio raraia.
- 32 Dokona ai ia na e hekorimu, gaigai na heto;  
duba na heto e hekorimu.
- 33 Matamu ese āgau idaudia bae ita,  
bona lalomu amo hereva gageva-gagevadia  
bae dae.
- 34 Oi na davara nuana ai e hekuremu tauna  
eiava lagatoi au-tubuana dorina ai e helaimu  
tauna  
hegeregērena ai ba hahelao.
- 35 Baoto: E botagu, to asina hisihisi;  
e dadabagu, to mamina asina abia.  
Edena nega ai baina noga?  
Inuinu āgauna ma ta baina tahua.

## 24

<sup>1</sup> Kara dika taudia basio vaēge henidia,

- ibamodia basio ura;
- <sup>2</sup> badina be lalodia ese dağedağe karadia e lalo  
hatamu,  
bona bibinadia ese hahedika karadia e  
herevalaimu.
- <sup>3</sup> Aonega ai rum a e hadaiamu;  
lalo-parara ai e haginiamu;
- <sup>4</sup> aonega ai ena daiutu na dava bada kohudia  
bona kohu namodia iboudiai amo e honumu.
- <sup>5</sup> Aonega tauna ese goada tauna e hereaiamu,  
bona mai dibana tauna ese mai goadana  
tauna e hereaiamu;
- <sup>6</sup> badina be hahekau mai aonegana amo emu tuari  
ba goadalaia,  
bona hahealo taudia hutuma daidiae ba kwal-  
imu.
- <sup>7</sup> Aonega na atai ai, kavakava tauna na basine  
davarie diba;  
hanua ikoukouna ai ia na se herevamu.
- <sup>8</sup> Kara dika ikarana e laloa hatamu tauna na  
hahedika tauna bae gwauraia.
- <sup>9</sup> Kara kavakavadia ilalo-hatadia na kerere,  
bona ġonaġona tauna na taunimanima ese bae  
inai henia bada.
- <sup>10</sup> Hekwakwanai dinana ai boma manoka-  
manoka,  
emu goada na maraġi-maraġi.
- <sup>11</sup> Mase dalana ai e laohaidiamu taudia na ba  
hamauridia;  
mase gabuna ai e dedi dobimu taudia na ma  
ba veridia lou.
- <sup>12</sup> Boma toma “A itaia, ina na do asia dibaia”,  
lalo e dibaiamu Diravana ese se itaiamu a?  
Laumamu e gimaiamu Diravana na asi dibana a?

Ia ese taunimanima davadia na edia ġaukara  
heġereġeredia ai baine henidia, ani?

- <sup>13</sup> Natugu e, bada-ranuna bavania, badina be ia na  
namo;  
labolabo edia ruma amo e hetuturumu ġauna  
na mai gaihona udumu ai.
- <sup>14</sup> Ba diba, aonega na unuheto, laumamu enai;  
boma davaria, vaira dinadia be dounu,  
bona emu helaro na basine doko.
- <sup>15</sup> Basio bani tao, kara dikta tauna ese kara maoro-  
maoro tauna ena ruma e bani henia taomu  
na heto;  
ena ruma na basio ġiġia dobi.
- <sup>16</sup> Badina be kara maoromaoro tauna na nega hitu  
e ketomu, ma e tore isimu;  
a kara dikta taudia na hahehisi karadia ese e  
doridia dobimu.
- <sup>17</sup> Oi inaimu e ketomu negana ai na basio hisi dae;  
e hetutuhimu negana ai na lalomu basine  
moale;
- <sup>18</sup> Iehova ese baine itaia, bena baine badu,  
bona ena badu na iena amo baine abia oho na  
garina.
- <sup>19</sup> Lalomu basine hekwarahi kara dikta taudia  
daidiae,  
bona kara havara taudia basio vaġeġe hen-  
dia;
- <sup>20</sup> badina be kara dikta tauna enai vaira dinadia na  
dia mimia;  
bona kara havara tauna ena lamepa na baine  
bodo.

- 21 Natugu e, Iehova bona hanua pavapavana na  
garidia ba gari,  
bona idia ta basio gwau edeede henia;
- 22 baduna be idia edia amo hahebua-tari baine  
hedinarai taku.  
Daika dibana dahaka hahedika na idia raru-  
osi edia amo bainema?
- 23 Aonega taudia edia hereva haida bini:  
Hahemaoro gageva-gageva na dia namo.
- 24 Kara dika tauna baine hamaoroa, baineto “Asi  
emu kerere”, tauna na  
bese idau-idau ese bae uduguiraira;  
orea idau-idau ese bae inai henia bada.
- 25 A kara dika tauna e sisiba heniamu taudia na  
moale bae davaria,  
bona hahenamo badana na latadiai baine  
kau.
- 26 Haere maorona e henimu tauna na  
bibinana amo e haherahumu tauna na heto.
- 27 Murimuri ai emu ġaukara ba heġaeġaelaia,  
tano paka ai emu ruma dagana bavabi  
heġaeġae;  
una murinai emu ruma ba haginia.
- 28 Dekemu tauna basio habadelaia kava;  
bibinamu amo basio koikoi.
- 29 Basioto: Ia vada e kara henigu heġereġerena  
baina kara henia;  
una tau ena kara do baina hadavaia.
- 30 Lahedo tauna ena uma na rakaia hanai,  
bona asi darana tauna ena vine imeana danu.
- 31 Bena na itaia, au ġinigini ese vada e habubunia,  
ava ġiniġini ese tano e lahea tao,  
ena nadi maġuna vada e hegiġi dobi.

- <sup>32</sup> Na itaia, bena na haeroa;  
na raraia, bena lalogu e parara.
- <sup>33</sup> Matamu ba taia, ba laḡa ani sisina,  
nega sisina kwaramu na imamu ai ba hahek-winaia;
- <sup>34</sup> bena ogōgami ese baine abimu, dadidadi tauna na heto,  
bona dabu na emu ai baine kau, tuari tauna na heto.

## 25

<sup>1</sup> Ini danu na Solomon ena hereva lada-isidia haida, Hesekia, Iuda pavapavana, ena orea taudia ese e tore hanai.

- <sup>2</sup> Dirava hairaina na ġau iħunidia ai,  
a pavapava hairaidia na ġau anidia itahudia ai.
- <sup>3</sup> Guba na atai ai e daemu bona tanobada na dobu gabudia ai e dihomu heġereġeredia,  
pavapava lalodia na basita tahudia diba.
- <sup>4</sup> Miro na e havevea *silver*-na amo ba kakaroa oho,  
ben a *silver* iġaukaralaina tauna na kehere ta baine karaia diba;
- <sup>5</sup> kara dika taudia na pavapva vairana amo bav-abidia oho,  
ben a ena terono na kara maoromaoro ai baine hedai.
- <sup>6</sup> Pavapava vairanai basio hekokoroku,  
eiava lohia ida basio gini bou;
- <sup>7</sup> badina be bae hamaoromu, baeto “Ini a dae mai”, be namo,  
a pavapava vairanai henu bae siaimu lao na dika.

- Matamu vada e ita karadia na  
<sup>8</sup> hahemaoro gabuna ai basio vareailai  
 harāga;  
 badina be dokona ai ede ba kara toma,  
 dekemu tauna ese baine hahemaraimu ne-  
 gana ai?
- <sup>9</sup> Dekemu tauna sibona ida emu lalo-hadai ba  
 herevalaia,  
 tau ta ena lalo-hadai hehunina basio hahedi-  
 naraia;
- <sup>10</sup> emu hereva baine kamonai tauna ese baine  
 hahemaraimu  
 bona harimu dikana basine doko na garina.
- <sup>11</sup> Hereva maorona ig vauraina na  
*gold* apolodia *silver* boseadia lalodai na  
 heheto;
- <sup>12</sup> sisiba tauna mai aonegana ena hereva taia ki-  
 rara tauna enai e gwauraiamu na  
*gold* gadeina eiava *gold* heraherana ta na  
 heto.
- <sup>13</sup> E siaia taudia ediai gwaukau tauna namona na  
 ninoa parakana taboro negana ai na heto;  
 ia ese biagudia lalodia e hamatamatadiamu.
- <sup>14</sup> Se henimu herahiana e heāgilaiamu tauna na  
 ori bona lai asi medudia na heheto.
- <sup>15</sup> Haheauka ese lohia lalona baine ania,  
 bona mala manadana ese turia baine hak-  
 waidua.
- <sup>16</sup> Bada-ranuna boma davaria, dodinai boma ania,  
 ianina ai lalomu baine aru bena ba mumuta  
 na garina.
- <sup>17</sup> Dekemu tauna ena rumu ai basio dae kau  
 momo,

- baine hesiku bena baine inai henimu na ga-rina.
- 18 Dekena tauna e habadelaia koikoi mu tauna na gahi eiava dare eiava diba mai matana na heto.
- 19 Hekwakwanai negana ai koikoi tauna iabidadama-henina na isi e hisihisimu eiava ae e dedimu na heto.
- 20 Lalo-metau tauna enai ane e abimu tauna na keru dinana ai hahedoki e doki ohomu tauna na heto,  
eiava hegarā muramurana bero ai na heto.
- 21 Inaimu bema hitolo, ana boma henia,  
bona ranu bema masea, ranu boma henia;
- 22 badina be unu amo lahi gidadia na kwarana ai ba senu kau,  
bena Iehova ese davamu baine henimu.
- 23 Lahara ese medu e mailaiamu,  
bona udu mauri ese vaira hua e havaraiamu.
- 24 Tau ta abikau ai baine noho be namo,  
a hereva momo hahinenā ida ruma ai bae noho bou na dika.
- 25 Hari namona gabu daudau amo na  
ranu keruma-keruma ranu-mase tauna enai na heto.
- 26 Kara maoromaoro tauna ese kara dika taudia edia dala se laoa ahumu na  
guri ranuna e duhumu eiava ranu bodaga e lohilohiamu na heto.
- 27 Bada-ranuna momo bavania na dia namo;  
unuhetomana danu heimodai herevadria momo basio gwaurai.
- 28 Asi ena haheauka tauna na  
vada e habuaia tari bona asi mağuna vada e rakatania hanuana na heto.

## 26

- <sup>1</sup> Kavakava tauna bae matauraia na dia namo;  
     una na *snow* siahу negana ai eiava medu  
     taboro negana ai na heto.
- <sup>2</sup> Bisini e roho loaloamu eiava aibisi e roho laomu  
     na heto,  
     heuduguirai asi badina na gabu ta ai se roho  
     kaumu.
- <sup>3</sup> Hekwadi varona na hosi ena, hahekau varona na  
     doniki ena,  
     bona hekwadi auna na kavakava tauna  
     doruna ena.
- <sup>4</sup> Kavakava tauna na ena kavakava heğereğerenai  
     basio haere henia,  
     ia ida ba heğereğere na garina.
- <sup>5</sup> Kavakava tauna na ena kavakava heğereğerenai  
     ba haere henia,  
     ia sibona ena ita-ita ai baine aonega na ga-  
     rina.
- <sup>6</sup> Gwaukau herevana na kavakava tauna imana ai  
     e siaia laomu tauna ese  
     sibona aena e utu ohomu bona dağedağe e  
     inuamu.
- <sup>7</sup> Hereva lada-isina kavakava taudia ududia ai na  
     ae-hedairike tauna aena e neveriverimu na  
     heto.
- <sup>8</sup> Kavakava tauna e matauraiamu tauna be  
     nadi na vilipopo ai e kwatua kaumu tauna na  
     heto.
- <sup>9</sup> Hereva lada-isina kavakava taudia ududia ai na  
     kekero tauna imana e gwadaiamu giniginina  
     na heto.
- <sup>10</sup> Kavakava tauna eiava kekero tauna raka-  
     hanaina ai e vatuamu tauna na  
     peva tauna taunimanima iboudiai e habero-  
     diamu na heto.

- 11 Kavakava tauna ena kara kava ma e karaia  
loumu na  
mumutana e lou heniamu sisiana na heto.
- 12 Tau ta o itaiamu, ia sibona namona e gwaura-  
iamu?  
Kavakava tauna na sisina baine namo,  
a una tau na basine namo diba.
- 13 Lahedo tauna na e tomu “Leona ta na dala ai;  
leona ta na ariara ai”.
- 14 Iduara na garugaruna ai e davedavemu na heto,  
lahedo tauna na ena mahuta patana ai unu e  
davedave tomamu.
- 15 Lahedo tauna ese imana na dihu ai e dau do-  
bimu;  
ma baine abia isi uduna ai na e hesikulaiamu.
- 16 Lahedo tauna sibona ena ita-ita ai ena aonega  
ese  
mai lalo-pararadia ida e haeremu taudia  
hahitu e hereadiamu.
- 17 Haida edia heai lalonai e vareaimu tauna be  
sisia na raka-hanaina ai taiana ai e abiamu  
tauna na heto.
- 18-19 Dekena tauna e koiamu, bena e tomu  
“Lau be na hevaseha mo” tauna na  
kava tauna lahi tutudia bona diba bona mase  
e tahodiamu na heto.
- 20 Asi rakuraku audia dainai lahi na e bodomu;  
bona asi hemaunu tauna gabuna ai heai e  
dokomu.
- 21 Badu haraǵa tauna ese heai e havaraiamu,  
guma gida latanai eiava au lahi latanai na  
heto.
- 22 Hemaunu tauna ena hereva na aniani namodia  
taidia na heheto,  
boga ai e dihomu.
- 23 Bibinana e manada-manadamu a lalona e  
dikamu tauna na

uro mai kopina kavari-kavarina na heto.

- <sup>24</sup> E heinaimu tauna na bibinana amo e helao ahumu,  
bona koikoi na lalona ai e huniamu danu;
- <sup>25</sup> hereva manadadia e gwauraimu negana ai basio kamonai henia,  
badina be lalo-hadai dika-rohorohodia hitu na ia lalona ai mimia.
- <sup>26</sup> Ena be ena heinai na koikoi ai e hegova ahumu,  
to ena dika na hebou ai baine hedinarai.
- <sup>27</sup> Guri e geiamu tauna na lalonai baine moru dobi,  
bona e hekeimu nadina ese e keiamu tauna na baine keia tao.
- <sup>28</sup> Koikoi malana ese e koidiamu taudia na e inai henidiamu,  
bona hahenamo koikoi herevadia e gwauraimu uduna ese hahebuatari e havaramu.

## 27

- <sup>1</sup> Kerukeru gaudiā basio heagilaidia;  
badina be asi dibamu dina ta ai dahaka baine vara.
- <sup>2</sup> Ta ese baine hanamomu, dia oi sibomu udumu;  
idaū tauna ta ese, dia oi sibomu bibinamu.
- <sup>3</sup> Nadi na metau, miri danu metau;  
a kavakaya tauna ena hahebadu daladia na metau herea.
- <sup>4</sup> Badu na mai dagedaġena; ia na abata na heto;  
a vaġeġe na daika ese baine ginia ahu?
- <sup>5</sup> Sisiba baine hedinarai na namo;  
lalokau baine hehuni na dika.
- <sup>6</sup> Hetura ai e henimu berodia na mai heabidadamadia ida,  
a inai tauna ena haherahu momo na mai koikoidia.

- <sup>7</sup> Boga-kunu tauna ese bada-ranuna e dadara-  
iamu,  
a hitolo tauna enai ġau iditadia iboudiai na  
mai gaihodia.
- <sup>8</sup> Ena noho gabuna e rakataniamu tauna na  
ena rumu e rohotaniamu manuna na heto.
- <sup>9</sup> Dehoro bona muramura mai bonana ese lalo e  
hamoaleamu;  
a hekwakwanai ese lalo e hadikaiamu.
- <sup>10</sup> Turamu bona tamamu turana basio rakatani-  
dia;  
bona hahehis i karana emu ai e kaum dinana  
ai  
tadikakamu ena rumu basiola.
- Dekemu tauna ena noho kahi ese  
tadikakamu ena noho daudau e hereaiamu.
- <sup>11</sup> Natugu e, ba aonega, lalogu na ba hamoalea,  
e gwau henigumu tauna baina haere henia  
totona.
- <sup>12</sup> Lalo-parara tauna ese hahedika e itaiamu, bena  
e komumu;  
a lalo-duhu taudia na e raka laomu, unu amo  
e hisihisimu.
- <sup>13</sup> Idau tauna dainai e gwau hamatamu tauna na  
ena dabua bavabia;  
bona idau taudia daidiae e gwau hamatamu  
negana ai,  
ieno amo gwauhamata toana do bavabia.
- <sup>14</sup> Daba matana ai e tore isimu, dekena tauna e  
hanamo badabadamu,  
tauna na heuduguirai tauna bae gwauraia.
- <sup>15</sup> Ĝadeġade hahinena na  
medu e hetuturumu na heto;
- <sup>16</sup> ia igwau-taona na lai igwau-taona na heto,

eiava ima idibana ai dehoro ikahu-taona na heto.

- <sup>17</sup> Auri ese auri e segeamu;  
     bona tau ta ese ma tau ta e segeamu.
- <sup>18</sup> Suke auna e reğuamu tauna ese huahuana baine  
     ania,  
     bona biaguna e gimaiamu tauna na bae  
     imodaia.
- <sup>19</sup> Tau ta lalona na tau ta lalona ai e heitamu,  
     ia vairana laulauna na ranu ai e heitamu na  
     heto.
- <sup>20</sup> Mase gabuna bona dobu masemase gabuna asie  
     honumu;  
     bona tau ta matana ese ġau se ita davanamu.
- <sup>21</sup> Uro na *silver* ena, lahi *gold* ena,  
     a tau ta itohona na heimodai ai e hedinaraimu.
- <sup>22</sup> Kavakava tauna na uit ida ba gwadaia hebou,  
     to ena kavakava na iena amo basine hekoki  
     oho.
- <sup>23</sup> Emu mamoe seridia ede e noho tomamu na ba  
     diba,  
     bona emu nani seridia ba reğudia;
- <sup>24</sup> badina be taġa na se mia hanaihanaimu.  
     Kwara ivavalaina ġau na uru iboudiai lalodiae  
     baine mia a?
- <sup>25</sup> Rei baine marai, ma rei matamata baine vara,  
     bona ororo avadia bae habou;
- <sup>26</sup> una negana ai mamoe natudia amo emu hahe-  
     doki ġaudia bavabi,  
     bona nani na emu tano davana ai baela;
- <sup>27</sup> nani ratana na baine davana oi amu,  
     bona emu rumtaudia adia,  
     bona emu hesiai kekenidia adia.

## 28

- <sup>1</sup> Kara dika taudia be ta ese se havadiamu negadia  
     ai e heau kavamu,  
     a kara maoromaoro taudia na e haheaukamu,  
     leona na heto.
- <sup>2</sup> Basileia ta ai e kara havaramu negadia ai,  
     ena pavapava na hoho;  
     a aonega bona lalo-parara taudia daidiae,  
     ia na nega daudau baine gini tutuka-tutuka.
- <sup>3</sup> Ogoğami tauna ese ogoğami tauna e hahisiamu na  
     medu baroko ese aniani ġaudia e hadikadia  
     oremu na heto.
- <sup>4</sup> Taravatu e rakataniamu taudia ese kara dika  
     taudia na e imodaidiamu,  
     a taravatu e badinaiamu taudia ese e biridia  
     ahumu.
- <sup>5</sup> Kara dika taudia na hahemaoro ġoevaġoeva asi  
     dibadia,  
     a Iehova e tahuamu taudia na dibadia vaitani.
- <sup>6</sup> Ogoğami tauna ena lalo-momokani ai e rakamu  
     be namo;  
     taġa tauna mai ena kara gageva-gageva na  
     dika.
- <sup>7</sup> Taravatu e badinaiamu merona na aonega  
     merona;  
     a ani-lavadae taudia e bamodiamu merona  
     ese tamana e hahemaraiamu.
- <sup>8</sup> Ena taġa na heato-kau kohudia amo e habada-  
     iamu tauna ese egogomu,  
     ogoğami taudia e bogadia hisimu tauna ena.
- <sup>9</sup> Taravatu ikamonaina amo taiana e daro kepoke-  
     pomu tauna  
     ena ġuriġuri na ġau dika-rohorohona.
- <sup>10</sup> Kara maoromaoro taudia kara dika dalana ai e  
     hakaudia kereremu tauna na

- sibona ena guri ai baine moru dobi;  
 a asi edia kerere taudia ese  
     ahudia namodia bae abi.
- 11 Tağa tauna na mai aonegana, sibona ena ita-ita  
     ai;  
     a ogogami tauna mai lalo-pararana ese ena  
         koikoi baine davaria.
- 12 Kara maoromaoro e kwalimumu negana ai  
     heimodai na bada;  
     a kara dika taudia e tore isimu negana ai  
         taunimanima bae komu.
- 13 Ena kara dika e hunidiamu tauna basine namo,  
     a ena kara dika e gwaurai hedinaraimu bona  
         e rakatanimu tauna na ena dika baine heg-  
         wau tao.
- 14 Nega idoinai Iehova garina e garimu tauna na  
     namo,  
     a lalona e ha-aukaiamu tauna na hahehis  
         lalonai baine moru.
- 15 Pavapava dikana ese ogogami taudia e biagudia  
     na  
     leona e ġoumu eiava bea e daġedagħemu na heto.
- 16 Pavapava asi lalo-pararana ese taunimanima e  
     hahisidia badamu;  
     a taġa iabi-koikoina e inai heniamu tauna ese  
         ena mauri dinadia baine hahohodia.
- 17 Taunimanima rarana e hahebubua tauna na  
     heau tauna ai bainela ela bona mase;  
     tau ta ese basine durua.
- 18 Kara maoromaoro ai e rakamu tauna na baine  
     roho mauri,  
     a kara gageva-gageva tauna na guri ai baine  
         moru dobi.
- 19 Ena tano e ruaiamu tauna ese aniani momo  
     baine abi,

- a kara asi anidia e karamu tauna na baine  
ogoğami herea.
- 20 Heabidadama tauna ese āgau namodia momo  
baine abi,  
a tağā e āgavalaiamu tauna ese mata-hakani ba-  
sine reaia.
- 21 Kaha ta ai mo e taomu karana na dia namo;  
a aniani taina helaoreana ai tau ta baine  
kerere.
- 22 Taga e ura heniamu tauna eseltağā e āgava hen-  
iamu;  
asi dibana ia na do baine ogoğami.
- 23 Tau ta e sisiba heniamu tauna ese gabeai lalo-  
namo bada baine abia;  
a malana amo e hanamo a koikoimu tauna ese  
lalo-namo maragi baine abia.
- 24 Tamana eiava sinana ena āgau e henaomu  
bena e tomu “Una na dia kerere” tauna na  
hahebua-tari tauna bamona.
- 25 Mata āganiğani tauna ese heiri-heiri e havara-  
iamu;  
a Iehova e abidadama heniamu tauna ena  
tağā do baine bada.
- 26 Sibona lalona e abidadama heniamu tauna na  
kavakava tauna;  
a aonega ai e rakamu tauna na do baine roho  
mauri.
- 27 Ogoğami taudia e harihari henidiamu tauna na  
basine dabu,  
a matana e hakapuamu tauna na bae  
uduguiraia bada.
- 28 Kara dika taudia e tore isimu negadia ai, tauni-  
manima na e komumu;  
a e masemu negadia ai, kara maoromaoro  
taudia na e hutumamu.

## 29

- <sup>1</sup> E sisiba henia momomu to aiona e ha-aukaiamu  
tauna na baine dika taku,  
asi ihanamona dalana ta.
- <sup>2</sup> Kara maoromaoro taudia e lohiamu negadia ai  
na taunimanima e moalemu;  
a kara dika taudia e lohiamu negadia ai na  
taunimanima e ġanaġanamu.
- <sup>3</sup> Aonega e ura heniamu tauna ese tamana e  
hamoaleamu,  
a ariara hahinedia ida e heboumu tauna ese  
ena kohu e hapetapetalaiamu.
- <sup>4</sup> Hahemaoro ġoeva amo hanua pavapavana  
ese basileia e haginia tutuka-tutukamu,  
a harihari ġaudia igwaurai-bagubagudia amo  
e havahuamu.
- <sup>5</sup> Dekena tauna e hanamo koikoimu tauna ese  
huo e otoamu,  
ia sibona ihatoalaina.
- <sup>6</sup> Kara dika tauna na ena kara dika ese e idoaiamu,  
a kara maoromaoro tauna na ane e abimu  
bona e moale hisi daemu.
- <sup>7</sup> Kara maoromaoro tauna na ogogami taudia ahu-  
dia korikori mai dibana,  
a kara dika tauna na lalo-parara  
unuhetomana asi dibana.
- <sup>8</sup> Heġonaġonalai taudia ese hanua e ha-araiamu,  
a aonega taudia ese badu e laoa ahumu.
- <sup>9</sup> Aonega tauna na kavakava tauna ida bema hep-  
apahuahu negana ai,  
kavakava tauna na e badumu bona e kirimu  
mo,  
a asie mainomu.
- <sup>10</sup> Rara ihahebubuna e uramu taudia ese asi ena  
kerere tauna e inai heniamu,

- a kara maoromaoro taudia ese ia ihamaurina  
dalana e tahuamu.
- 11 Kavakava tauna ese ena badu e halasiamu,  
a aonega tauna na badu ai e haheaukamu.
- 12 Pavapava ese hereva koikoidia bema abidia dae  
negana ai,  
ia henuna taudia iboudiai na bae kara dika.
- 13 Ogoğami tauna bona ia e hahisiamu tauna raru-  
osi e hevaira hehenimu,  
bena Iehova ese raruosi matadia e hadiaridi-  
amu.
- 14 Pavapava ese ogoğami taudia bema hahemaoro  
henidia mai maoromaorona ida;  
ena terono baine gini hanaihanai.
- 15 Hekwadi auna bona sisiba herevadia ese  
aonega e havaraiamu,  
a sibona ena ura e karamu merona ese sinana  
e hahemaraiamu.
- 16 Kara dika taudia e lohiamu negadia ai na kara  
havara e bada e laomu,  
a kara maoromaoro taudia ese edia moru bae  
itaia.
- 17 Natumu matana ba hakania, bena ia ese lağ-a-anı  
baine henimu,  
bona lalomu do baine hamoalea.
- 18 Lalo-diari lasi negana ai, taunimanima e kara  
havaramu,  
a taravatu e badinaiamu tauna na namo.
- 19 Hesiai tauna na hereva amo mo matana se  
hakaniamu;  
badina be lalona e pararamu, a nahuana se  
tohoamu.
- 20 Hereva takutaku tauna ta o itaiamu a?  
Kavakava tauna na reana baine namo, a una  
tau basine namo diba.

- <sup>21</sup> Ena hesiai tauna na merona ai e hagabuğabua  
tauna na  
dokona ai baine hekwarahi ia dainai.
- <sup>22</sup> Badu tauna ese heiri-heiri e havaraiamu,  
bona badu momo tauna ese kara dika momo  
e havaramu.
- <sup>23</sup> Tau ta ena hekokoroku ese baine hahekwick-  
wanaia,  
a manau tauna na bae imodaia.
- <sup>24</sup> Henao tauna bamona ese sibona ena mauri e  
inai heniamu;  
heuduguirai herevana e kamonaimu, to  
dibana ġaudia se herevalaidiamu.
- <sup>25</sup> Taunimanima igari-henidia ese idoa e atoamu,  
a Iehova e abidadama heniamu tauna na ba-  
sine dika.
- <sup>26</sup> Hutuma ese pavapava ena lalo-namo e  
tahuamu,  
a Iehova enai tau ta ese hahemaoro goe-  
vağoeva e abiamu.
- <sup>27</sup> Kara gageva-gageva tauna na kara maoro-  
maoro taudia ese e inai henia badamu,  
a dala maoromaoro ai e rakamu tauna na  
kara dika taudia ese e inai henia badamu.

### 30

- <sup>1</sup> Aguru Iake, tau Masa, ena hereva bini. Hari  
tau eto:  
Na hesikumu, Dirava e, na hesikumu;  
Dirava e, egu goada vada e ore.
- <sup>2</sup> Momokani, lau na kavakava herea, dia tauni-  
manima na heto;  
asi daragu taunimanima darana na heto.
- <sup>3</sup> Aonega asina davaria;  
Helağā Diravana na asi dibagu.
- <sup>4</sup> Daika na guba ai vada e dae, bona ma e diho?

Daika ese lai na imana ai vada e kahua tao?  
 Daika ese davara na dabua ai vada e kumia?  
 Daika ese tanobada dokodia iboudiai vada e  
     hadai?  
 Ia ladana be daika, bona natuna ladana be daika?  
     Vada o diba, ani!

- 5 Dirava ena hereva iboudiai na momomo-kakani;  
     enai e roho maurimu taudia edia kesi na ia.
- 6 lena hereva latadai hereva ta basio atoa kau,  
     baine gwau henimu bena emu koikoi baine  
     hedinarai na garina.
- 7 Ģau rua emu ai na noimu;  
     do asina mase ai basio rudia.
- 8 Koikoi karadia bona herevadia egu amo bav-  
     abidia daudau;  
     ogogami eiava tağā basio henigu,  
     a egu hitolo heğereğerenai ai mo ba ubugu;
- 9 bogagu baine kunu bena baina ġoremu,  
     bainato “Iehova be daika?” na garina;  
     eiava baina ogogami, bena baina henao-henao,  
     bona egu Dirava ladana baina ġonağonalai na  
     garina.
- 10 Hesiai tauna na biaguna enai basio habadelaia  
     koikoi;  
     baine uduguiraimu, bena kereremu bae  
     gwauraia na garina.
- 11 Haida ese tamadia e uduguiraidiamu,  
     bona sinadia asie hanamodiamu.
- 12 Haida na sibodia edia ita-ita ai ġoġoeva-ġoġoeva  
     etomamu,  
     a ġau be edia miro amo do asie ġoġoeva.
- 13 Haida be matadia e heaġimu,

bona ibunidia e haroroka-rorokamu.

- <sup>14</sup> Haida na isedia be dare,  
     bona gadigadidia be kaia;  
 idia ese ogoğami taudia tanobada amo e anidia  
     oremu,  
     bona e dabumu taudia taunimanima bogaragidia amo danu.
- <sup>15</sup> Doma na mai natuna hahinedia rua;  
     “A henimai, a henimai” e tomu.  
 Ğau toi bogadia asie kunumu;  
     ğau hani nega ta asie tomu “Vadaeni”.
- <sup>16</sup> Gaudia be mase gabuna, bona gabani hahinen  
     bogana,  
     bona tanobada, nega idoinai ranu e  
     maseamu,  
     bona lahi, nega ta asine tomu “Vadaeni”.
- <sup>17</sup> Tamana e ǵonaǵonaliamu bona sinana e gwau  
     eedeede heniamu tauna matana na  
     koura galodia ese bae giboa lasi,  
     bona ugava ese bae ania.
- <sup>18</sup> Ğau toi na mai hoadia bada egu ai;  
     ğau hani be asi dibagu.
- <sup>19</sup> Ğaudia be ugava ena dala guba ai,  
     bona gaigai ena dala hagahaga nadina ai,  
 bona lagatoi ena dala gadobada ai,  
     bona tauhau ena dala hane-ulato enai.
- <sup>20</sup> Heuda-hanai hahinen ena dala binai:  
     e anianimu, bena uduna e dahuamu,  
     ben a e tomu “Asina kerere”.
- <sup>21</sup> Ğau toi henudiai tanobada e heude-heudem  
     ğau hani henudiai basine gini auka.

- 22 Ġaudia be hesiai tauna, pavapava ai e hahe-laomu negana ai;  
 bona kavakava tauna, bogana e kunumu ne-gana ai;
- 23 bona ta ese se lalokau heniamu hahinena, e headavamu negana ai;  
 bona hesiai kekenina, biaguna gabuna e abi-amu negana ai.
- 24 Ġau hani tanobada ai na mamaraġi,  
 a idia na a'aonega heherea:
- 25 dimairi na asi goadadia,  
 to taboro negana ai adia e haboumu;
- 26 miġu danu asi goadadia,  
 to edia rumu na tano lalonai e karamu;
- 27 kwadi na asi edia pavapava,  
 to e raka ere-eremu, tuari oreana na heto;
- 28 vaboha na imamu ai bavabia diba,  
 to ia na pavapava edia rumu ai e nohomu.
- 29 Ġau toi e raka ruturutumu;  
 ġau hani e raka turiaturiamu.
- 30 Ġaudia be leona, uda ġaudia bogaragidiai ia mo herea,  
 bona ġau ta vairanai ia na se raka murimu;
- 31 bona kokoroku maruanena; bona nani marua-nena;  
 bona hanua pavapavana, ena orean matana ai e rakamu.
- 32 Boma kavakava, sibomu boma heaġi,  
 eiava kara dika boma laloa hata,  
 bena udumu na imamu amo ba koua.

<sup>33</sup> Badina be rata ba taoa, rata-hetarina digarana  
ba davaria;  
bona udu baubauna ba taoa tari, bena rara  
baine aru;  
bona badu ba taoa, bena heiri-heiri baine  
vara.

### 31

<sup>1</sup> Lemuele, Masa pavapavana, ena hereva bini,  
simana ese e hadibalaia herevadia.

<sup>2</sup> Natugu e, bogagu amo o vara merona,  
natugu e, egu gwauhamata amo o vara  
merona,  
ede baina hereva henimu toma?

<sup>3</sup> Emu goada na hahine basio henidia;  
emu dala na pavapava iala-masedia taudia  
basio henidia.

<sup>4</sup> Dia namo, Lemuele e,  
dia namo pavapava ese vine ranuna bae inua;  
dia namo hanua lohiadia ese kekeru muramurana bae ura henia;

<sup>5</sup> bae inu bena taravatu bae readia,  
bona hisi e animu taudia iboudiai ahudia korkori bae ha-idau na garina.

<sup>6</sup> Kekero muramurana na mokona e masemu  
tauna ba henia,  
bona vine ranuna na lalodia e hisihisi hereamu taudia ba henidia;

<sup>7</sup> do bae inu, bena edia ogogami bae laloa boio,  
bona edia hisihisi basie laloa une.

<sup>8</sup> Udumu ba hapapaia, mu taudia daidiae,  
bona ihareha iboudiai ahudia korikori  
daidiae.

<sup>9</sup> Udumu ba hapapaia, ba hahemaoro mai maoro-maoromu ida,

ogogami taudia bona e dabumu taudia ahu-dia korikori inanatalaidia.

- 10 Hahine namona na daika ese baine davaria?  
Ia ese herahera nadinadidia namo-heredia e hereadiamu.
- 11 Adavana lalona ese ia e abidadama heniamu,  
bona āgau namodia ai basine dabu.
- 12 Hahine unuhetomana ese adavana e hanamoamu, se hadikaiamu,  
ena mauri dinadia iboudiai lalodiae.
- 13 Mamoe huina bona lagwa varona e tahudiamu;  
ia imana na gaukara e uramu.
- 14 Ia na hoihoi taudia edia lagatoi na heheto,  
ana aniani na dauha amo e mailaimu.
- 15 Daba vaburana ai e tore isimu,  
ena rumu taudia adia e nadu hatamu,  
bona ena hesiai kekenidia edia āgaukara e henidiamu.
- 16 Tano ta ihoina e lalo-hadailaiamu, bena e hoiamu;  
ena āgaukara anina amo vine imeana e hadoamu.
- 17 Goada e rioamu,  
bona imana e ha-aukadiamu.
- 18 Ena hoihoi anidia namodia e itamu;  
hanuaboi ai ena lamepa na se bodomu.
- 19 Dabua ihatuna auna na imana ai e abiamu,  
bona igirolaina gau na imana amo e dogoa taomu.
- 20 Ia ese imana e kehoamu ogogami taudia ediai;  
bona imana ruaosi e toi roromu, e dabumu taudia ediai.
- 21 Keru negana ai ena rumu taudia se kudou hetahalaidiamu,

- badina be iboudiai na mai edia dabua  
kakakakadia.
- 22** Ia ese hetaru e karamu;  
    ena dabua na *linen* namo-hereana bona  
    dabua kakakaka miakoremana.
- 23** Hanua ikoukoudia lalodiae taunimanima ese ia  
    adavana e dibaiamu;  
    ia na hanua tau-badadia bogaragidiai e  
    helaimu.
- 24** Ia ese *linen* dabuadiae karadiamu, bena e hoidi-  
    amu;  
    gaba ġaudia danu hoihoi taudia dekedia e  
    siaidia laomu.
- 25** Goada bona ninina-namo e hahedokilaidiamu;  
    nega vaira dinadia ia ese e kiri henidiamu.
- 26** Uduna e hapapaiamu mai aonegana ida,  
    bona hebogahisi ihahedibalaina na matana  
    ai.
- 27** Ena ruma taudia edia kara e ita taomu;  
    bona aniani inonogadia se animu.
- 28** Natuna e tore isimu, namona e gwauraiamu;  
    adavana ese e imodaiamu danu, e tomu:
- 29** Hahine hutuma vada e kara namo herea,  
    to oi ese iboudiae o hereadiamu.
- 30** Kara laloa-laloa na koikoi, bona hairai na asi  
    anina;  
    a Iehova garina e garimu hahinenai na bae  
    imodaia.
- 31** Ena gaukara anina ba henia,  
    bona ena kara na hanua ikoukouna ai do bae  
    imodaia.

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca